

Binga Ewamei Awa John Mi Gaisira

EMBORO EIEDO DA EMBO GOD DA KINAPEINA ISERA

¹ Rora berari ae tuturo da Iesu Keriso uso jawo nei God da ge atinatina. Umo God de daedo atinatina. Edo umosuka awa God. ² Edo be tuturo da awa umo God ga atinatina.

³ Edo God umo awodo rora berari awa isira. Edo rora berari boroko atira awa unemi isira.

⁴ Edo Iesu Keriso wasiri be awa budo atima ira. Edo uso wasiri mi embo da yei usasa itido ira.

⁵ Uso wasiri awa umenga da janibedo ira awa usasa ra. Edo usasa awa mata janiburise atima ira ko umenga mi mana ari ambadira.

⁶⁻⁷ God uso binga sari embo John itiri embo da yei usasa awa sari gorase bugusira. God umo embo berari mi binga awa ingido ge be orase sedo John itiri bugusira. ⁸ John umo umosuka awa usasa awa aera. Umo embo da yei usasa awa sari gorase bugusira. ⁹ Amboda embo usasa be awa bugudo busu berari da embobo da yei janiburisira.

¹⁰ Edo Iesu Keriso bugudo busu da embo da teda atisira. Unemi busu isira edo busu da rora berari de embo de isira te embo umo embo averi awa gaera. ¹¹ Umo uso busu topo da bugusira te uso embo topo umo ujo ae isera. ¹² Awarate embo gebe edo umo budo isera ainda bajari ari itiri edo God da kinapeina edo isera. ¹³ Iji ainde

ungoda aimono mi ungo ingedo isera edo ungo God da kinapeina ae edo isera. Daedo ungodaa de mamode mi ungo oro God da kinapeina orase ae edo isera. Awarate God da goroba mi ungo God da kinapeina isera.

¹⁴ Edo Iesu Keriso uso jawo nei God da ge embo edo ingodenaso teda atisira. Edo dubo bari de kotembedo doari de gebe de mi uso jo ato ae isira. Edo ingodena uso wasiri da usasa God mi ititisira awa gosisera. Edo God usasa awa uso yei ititisera ainda be awa umo awa uso mei awo da awasedo.

¹⁵ Edo John Iesu Keriso da jawo da ge sisira edo minonu sisira, “Matu na ingoda seteno gosisewa embo nei bugadira. Edo uso wasiri mi naso wasiri derigurira ainde be awa naso aia na kumbae atiri umo atima isira seteno gosisewa Embo amone awa ra.” ¹⁶ Edo Iesu Keriso dubo bari kotembedo doari de gebe be mi ingodena berari ewamei etira. Unemi ewamei ari jiwae tamo da tamo da itido ira. ¹⁷ Edo God uso agodari ingodenaso yei itari dipapa edo Moses ititisira te umo ingodenaso yei dubo bari de kotembedo doari de gebe de itari dipapa edo Iesu Keriso ititisira. ¹⁸ Edo embo da amemi God gaera awarate uso mei awo da amimi uso Mamo ga atima ira amimi umo ingodenaso yei karigedo ira.

JOHN UMO AVERI AWA SISIRA TANO

¹⁹ Jew embobo da gitijijigegari Jerusalem nati da atisera amimi priest embobo de priest da kondade ari embobo de awa John da yei umo umoburo ro edo iri awa nganega adi mambusera.

²⁰ Edo ungo John nganega isera edo umo gebe awa unjugae rate sisira, “Na awa soregari embo God mi itari bugarase sisira awa aera.”

²¹ Setiri ungoi nganega isera, “Imo mo binga sari embo matu atisira Elijah ta?”

Setero umo mina sisira, “Na embo awa aera.”

Setiri ungoi nganega isera, “Imo mo God da binga sari embo nango simba ewora awa ta?”

Setero mina sisira, “Awa aera.”

²² Setiri ungoi sisera, “Imo mo averi awa se gore. Edo embo amemi nango itero bugera awa gadi dipapa era awasedo iso mina sari awa se gore.”

²³ Setero John mi ro God da binga sari embo Isaiah mi sisira awa ungo da yei sisira, “Na awa dumbari yei da embo atise minonu sadira, ‘Bada da bugari emboro sia ewo. Edo uso emboro ewo dambuderari are.’ ”

²⁴⁻²⁵ Setiri edo embo Pharisee embomei itero bugusera amimi John da yei ngnega isira, “Edo imo soregari embo God mi itari bugarase sisira awa ae edo Elijah ta ko binga sari embobo nango simba ewora awa ae mo ro edo imo umo mi embo ewamei edo esi?”

²⁶ Setero John mi mina sisira, “Na embo umo mi ewamei edo ena. Edo embo nei bugudo ingoda teda atira te ingo umo gaera. ²⁷ Edo iji tupo atae ari umo uso buro ingoda teda tuturo adira. Umo awa embo nembodiba ra te na awa embo nembodiba aera. Edo na awa ewa raro uso tei goru simba eni?”

²⁸ Eiawa berari Bethany nati da wosedo yari umo Jordan umo be nei da isira. Edo umo ainda John umo umo mi embo ewamei edo isira.

JOHN MI IESU EMBO DA YEI UJJI ISIRA TANO

²⁹ Iji nei John Iesu uso yei bugutiri gido sisira, “Embo oiawa giwo. Umo teta wo sheep da mei mi busu berari da embobo da wasiri biae awasedo betarago adira umone God da mei ra. ³⁰ Matu na ingoda yei siutana, ‘Embo nei amboda bugadira. Uso wasiri mi naso wasiri awa derigari ra ainda be awa naso ai na bae atiri umo atima isira.’ Embo amone eire. ³¹ Edo na umo embo averi awa na gaera te na embo umo mi ewamei ise Israel embobo da umo isaga adi bugusena.”

³² Edo John embo da yei umo ro gosisira awa sisira, “Na Asisi Kotopu teta ribo inge utu dodo wosedo Iesu da yei anumbetiri gosisena. ³³ Edona umo gaera te God na umo mi embo ewamei anase itiri bugusena amimi naso yei sisira, ‘Imo Asisi Kotopu mi embo da da yei petari gadesa embo re amimi embo Asisi Kotopu mi ewamei adira gio.’ ³⁴ Edo na rora berari awa etiri gido, gido ingoda yei sena embo amone God da mei na.

EMBO NENEI IESU DA AMBOJIMBI ISERA TANO

³⁵ Iji nei John uso ambojimbi etoto de sekago yei ainda bugusira. ³⁶ Edo John Iesu bugutiri gido sisira, “Emone God da mei teta wo sheep da mei mi betarago adira.”

³⁷ Edo John da ambojimbi etoto ge awa siri ingido Iesu ambo ambo isera. ³⁸ Edo ungo umo ambo ambo ero Iesu wareregedo ungo gido ungodu yei nganega isira, “Ingo ro dipapa evi?”

Setiri ungomi mina sisera, “Rabbi ainda be awa atopatari imo nonda atima esi?”

³⁹ Setero mina sisira, “Puwo gave.”

Awasedo ungo daga mambudo umo rawainda atima isiri awa gido ungo ainda ungae atisera ainda be awa ongobo etiri gido.

⁴⁰ Edo John da ge ingido Iesu ambo ambo isera ainda embo nei awa Andrew, Simon Peter da namendi. ⁴¹ Umo mambudo uso namendi Simon tambudo sisira, “Nango Iesu Keriso Soregari Embo God mi itari bugarase sisira awa tambera.” ⁴² Sedo Simeon budo Iesu da yei bugusira.

Edo Iesu umo ditini ise sisira, “Imo awa Simon, John da mei ra te iso jawo awa seka Peter sadera ainda be awa ganuma.”

IESU PHILIP DE NATHANAEL DE JAWO SISIRA

⁴³ Sipo nei Iesu Galilee busu da mambadi sedo erido Philip tambudo sisira, “Na ambo ambo eio.”

⁴⁴ Edo Philip awa Bethsaida nati embo ra. Edo Andrew de Peter de awa daedo nati ainda atima isera. ⁴⁵ Edo Philip Nathanael tambudo uso yei sisira, “Nango embo Moses mi agodari da gaisira edo binga sari embobo daedo gaisera embo awa tambera. Umone Iesu ra Joseph da mei na Nazareth nati embo ra.”

⁴⁶ Setiri Nathanael mi nganega isira, “Ingode Nazareth nati da rora ewamei nei tamberi ta?” Setiri Philip mi mina sisira, “Puio gase.”

⁴⁷ Edo Iesu Nathanael gido uso yei bugutiri uso jawo da sisira, “Emone Israel embobo da embo moka ra. Umo embo biae aera.”

⁴⁸ Setiri Nathanael mi uso yei nganega isira, “Imo na rawodo na gari ri?”

Setiri Iesu mi mina sisira, “Philip mi imo jawo sae atiri giti da na imo betora utumo da anumbedo ateso jiro mi buro edo getena.”

⁴⁹ Setiri Nathanael mi sisira, “Atopatari imo awa God da mei na edo imo awa Israel embobo da gitijigari nembodiba ra.”

⁵⁰ Setiri Iesu mi sisira, “Na boroko iso yei setena imo betora utumo da ateso getena awa setena. Awasedo imo na gebe esi ta? Amboda wasiri eiawa derigedo nenei irirari gadesa. ⁵¹ Na iso yei gebe sena utu pirigari God da asisi ewagaewa na God da mei embo isena ainda yei vitido wowosiroro gadesa.”

2

IESU JIMBARI BONDO DA MAMBUSIRA

¹ Iji etoto atae etiri Iesu da ai awa Cana nati da jimbari bondo da mambusira, Galilee busu da.

² Edo bondo susu mi Iesu de uso ambojimbi de awa oru isira awasedo ungoi mambusera. ³ Edo jimbari bondo da embo grape be da ngamo awa indero atae etiri Iesu uso ai mi uso yei sisira, “Grape be da ngamo awa atae etira.”

⁴ Setiri Iesu mi uso yei sisira, “Evetu ro anase awa seose ko naso iji awa bugae ra.”

⁵ Setiri Iesu uso ai mi agipo embobo da yei sisira, “Ro awase sadira awa ewo.”

⁶ Edo Jew embobo ungodu mamoumbogo da tamo segari wasiri awa ambo ambo edo isera awasedo utingi berari 6 awa ainda derido atisera. Edo utingi da awa 100 ta 120 litres umo awodo badira.

⁷ Edo Iesu mi agipo embobo da yei sisira, “Utingi eiawa umo mi dimbuwo beda are.” Setiri umo jojetero utingi beda isera.

⁸ Beda etero Iesu mi ungodda yei sisira, “Umo ou einda nenei awa budo jimbari bondo susu da mambuwo.”

⁹⁻¹⁰ Setiri budo uso yei mambero umo umo wareregedo ri grape be da ngamo isira awa gambudo gosisira. Edo agipo embobo ungo umo rawainda buriseri awa gosisera te bondo susu awa gae awasedo umo jimbari iu awa jawo sedo uso yei sisira, “Embo berari giti ri grape da be da ngamo ewamei awa giti itoro indido era. Edo amboda esega embobo awa jiwae indoro grape ngamo nei kiambu ewamei awa amboda itido era. Awarate imo nangoda yei ri grape ngamo ewamei awa amboda itesa.”

¹¹ Edo wasiri nembodiba Cana nati da Galilee busu da Iesu mi isira awa uso wasiri goroba de ari da tuturo ra. Edo umo wasiri goroba de eiawa etiri uso ambojimbi uso wasiri da usasa awa gido umo gebe isera.

¹² Edo jimbari bondo atae etiri Iesu uso ai de nanonamendi de ambojimbi de Capernaum nati da mambudo iji tupo ainda atisera.

IESU JEW EMBOBO DA TUMONDEBAIN ARI ORO JERUSALEM NATI DA AWA ESEGA ISIRA

¹³ Edo Jew embobo da jarusegari bondo da iji awa asuburiri gido Iesu Jerusalem nati da mambusira. ¹⁴ Ainda bugudo umo Jew embobo da tumondebain ari oro da mambudo embo rorou itari wo oxen de sheep de gumbara de ori ero gosisira. Edo umo daedo embo gano mina ita ise ungodda tendeba be da atero gosisira. ¹⁵ Gido esi mi ituka mendo da digido wo mane berari awa ondetiri Jew embobo da tumondebain ari oro

awa dodo wowosisera. Edo ganu mina ita isera ainda tendeba jigido kapotegetiri ungodu ganu sibereberegisa isira. ¹⁶ Edo embo gumbara ori isira ainda yei sisira, “Budo dodo ponda mambu. Naso Mama da mando awa awo ingoda ori garori ari yei eure.”

¹⁷ Setiri uso ambojimbi jiwari mi sisira awa kotemburisira. Edo jiwari mi sira, “O God naso dubobari iso oro da awa teta riawo mi nasu jo da ewarago ira.”

¹⁸ Edo umu awa setiri Jew embobo da gitijijigegari mi uso yei mina sedo nganega isera, “Wasiri goroba de ro aso nango gido gebe God mi sira awa inemi nango da tumondebain ari oro da wasiri awodo esa awa nango gebe eri?”

¹⁹ Setero Iesu mi mina sisira, “Ingo God da oro eiawa arasegadewa awa iji tamonde de jigano sekago eradira.”

²⁰ Setiri ungu ge bebegae sise sisera, “Nangoda mamoumbogo gaeko 46 joda Jew embobo da tumondebain ari oro eiawa isera. Edo imo kotesa iji tamonde de inemi sekago jigaso ereita?”

²¹ Awarate oro Iesu sisira awa uso tamo ra. ²² Awasedo amboda Iesu bebetisira ainde God mi umu etiri eriri uso ambojimbi uso ge awa kotemburisera. Edo ungu ge eiawa gebe ise edo jiwari awa gebe gosisera.

²³ Edo Iesu umu Jerusalem atise jarusegari bondo iji de embo jiwae uso wasiri goroba de ira awa gido umu gebe isera. ²⁴ Awarate Iesu embo ro kotera awa gido gido umu embo jiwae isera ainde daedo tatae isira. ²⁵ Edo umu embo nenei da yei embo rawodo iri awa nganega ae

doturisira ainda be awa umo umosuka embo da kotari rawodo iri awa gosira awasedo.

3

IESU NICODEMUS ATOPAPOTISIRA

¹ Embo Nicodemus awa Jew embobo da gitijigari ra. Edo umo awa Pharisee embobo da embo nei na. ² Tumba da umo Iesu da yei mambudo uso yei sisira, “Atopatari nango gosera imo awa atopatari God mi itiri bugusesa ko God embo ainde atae awa embo awa mana wasiri goroba de awa mana adira.”

³ Edo umo awodo setiri Iesu mi uso yei sisira, “Na iso yei gebe sena embo ave wasiri seka kumbae adira teta embo tini da edo seka bugarago adira embo awa mana God mi umo gitijigadira iji awa gadira.”

⁴ Setiri Nicodemus mi mina sisira, “Edo embo uso ai da tini da sekago torari edo amimi umo sekago bae etita?”

⁵ Setiri Iesu mi mina sisira, “Na iso yei gebe sena embo da ainda ai mi umo tuturo da badira te amboda embo awa Asisi Kotopu da wasiri seka kumbae adira teta embo tini da edo seka bugarago adira awa umo mana God da gitijigari yei da mana toradira. ⁶ Embo da uso aimamo ga mi embo da tamo da wasiri itido era te Asisi Kotopu mi embo da joda toruri umo wasiri seka kumbudo ira. ⁷ Edo na iso yei sena wasiri seka kumbuio teta embo tini da edo seka bugarago adira sena awa kove eose. ⁸ Bisara umo yei dipapa ira ainda sumbudo ira edo imo uso javi awa ingesa te imo umo rawainda tuturo edo sumbiri

edo yei rawainda mambutiri awa imo gaera. Da awodo Asisi Kotopu wasiri edo ira. Ingodena Asisi Kotopu mi embo nei amenda wasiri seka iteiri awa gaera.”

⁹ Edo umo awodo setiri Nicodemus mi uso yei nganega isira “Wasiri emomo rawodo eiri?”

¹⁰ Setiri Iesu mi mina sisira, “Imo awa Israel embobo da atopatari nembodiba ra. Edo imo na ro sena mo gadi jaresi ta? ¹¹ Edo na iso yei gebe sena ro nango nangoda jiro mi gosera edo nangoda diti mi gosera awa nango ingoda yei sera awarate ingo embo berari awa nangoda binga awa ujo ae ewa. ¹² Edo na iso yei ro busu da edo ira awa sano imo na gebe ae adesa edo na iso yei ro utu da ira awa sano mo imo rawodo na gebe esi? ¹³ Na nasuka God da mei embo isena awa utu dodo busu da wowosisena. Edo amboda na sekago utu da vitadena.

¹⁴ “Edo Israel embobo yei ro atae da atero Moses mi jingabu kevedo ituka da itido jigiri vivitisira da awodo God da mei embo isira awa ungomu jigoro vitadira. ¹⁵ Edo ungomu umu jigoro vitari embo amemi umu gebe adira awa wasiri natopo atari badera. ¹⁶ God busu berari da embo dubo be burisira awasedo umu uso mei awo da awa itiri bugusira. Edo embo amemi umu gebe adera awa mana riawo matawa eudo ira ainda toradira te wasiri natopo atari badera. ¹⁷ God uso mei awa busu berari da embo awa kasarase itae bugae ra te soregarase ititisira.

¹⁸ “Embo ave God da mei gebe edo ira awa God mi mana kasadira te embo ave gebe ae edo era awa God mi matu kasetira ainda be awa embo awa God da mei awo da awa gebe ae etira

awasedo. ¹⁹ Edo kasari bugudo ira ainda be re eire. Usasa busu berari da embo da yei bugusira te embo usasa ujo ae edo umenga da atari dipapa isera ainda be awa ungo iji berari wasiri bebegae edo era awasedo. ²⁰ Embo ave wasiri biae edo ira awa usasa ujo ae edo ira edo usasa da purae edo ira ainda be awa embo awa uso wasiri bebegae awa isaga ari ujo ae edo ira awasedo. ²¹ Awarate embo ave ro gebe awa edo ira awa embo awa usaga da bugudo ira edo God mi ro arase dipapa ira awa ira awa embo mi gorase sedo.”

JOHN USO AMBOJIMBI DA YET AWA IESU AWA UJUGURISIRA

²² Ainda amboda Iesu uso ambojibi de Judea busu da mambusera. Edo ungo ainda iji tupo atero Iesu umo mi embo ewamei isira. ²³⁻²⁴ Edo Herod John gajari oro da itae atiri John umo mi embo ewamei isira daedo. Edo John umo nati Aenon nati Salim aikambu mambusira ainda be awa umo jiwae atira awasedo. Edo embo John mi ungo umo mi ewamei orase bugudo isera doae.

²⁵ Edo John da ambojimbi nenei mi Jew embo de Jew embobo da tei ingo segari da agodari da ge bagisera. ²⁶ Awasedo ungoi John da yei mambudo sisera, “Atopatari embo inemi Jordan umo be nei da soregari embo sisesa amimi umo mi embo ewamei ira edo embo berari uso yei mambutera.”

²⁷ Setero John mi mina sisira, “Rora berari ro embo da yei bugudo ira awa God mi uso yei itido ira. ²⁸ Edo ingo ingosuka gosewa na ingoda yei ro sisena awa na awa soregari embo God mi itari bugarase sisira awa ae rate God mi na uso emboro sia anase itiri bugusena. ²⁹ Edo jimbari

iu mi evetu jimbira awa evetu awa embo ainda topo ra. Edo jimbari iu ainda otao awa iaviri etira ainda be awa iu awa evetu seka tambira awasedo. Da awodo na iaviri ena ainda be awa embo berari awa Iesu da yei mambutera awasedo. ³⁰ Edo umo awa embo nembodiba irirari edo na awa embo kiambu adena.

³¹ “Embo da utu dodo busu da wosedo edo embo berari busu da atera awa dodo derigadira ainda be awa embo busu da atira awa rora busu da atira ainda ge awa sedo ira. ³² Edo embo utu dodo busu da wosedo edo umo ro utu da gosise edo ingido ira awa sedo ira te embo jiwae be mi uso binga awa ujo ae edo era. ³³ Edo embo amemi uso binga awa budo era awa God awa ge be awa tambudo era. ³⁴ Edo embo ave God mi ituri bugudo era awa God da ge awa sedo ira ko God mi umo awa Asisi Kotopu mi sirido ira awasedo. ³⁵ God mi uso mei dubo budo edo rora berari gitijigarase ititisira. ³⁶ Edo embo ave mei ge be adera awa wasiri natopo atari badera te embo ave mei ujo ae adera awa mana wasiri natopo atari badera. Edo umo mei ujo ae adira awa God da tini gambari awa uso yei natopo atadira.”

4

SAMARIA BUSU EVETU DA IESU GEBE ISIRA

¹ Pharisee embomei binga ingisera, Iesu mi umo mi embo ewamei iri uso ambojimbi awa jiwae edo John da ambojimbi derigetira awa ingisera. ² Awarate Iesu umo umosuka embo umo mi ewamei ari ae ra te uso ambojimbi mi era. ³ Edo Iesu embo mi ro sera awa ingido Judea busu awa dodo engenebedo Galilee busu

da mambusira. ⁴ Edo Galilee busu da mambari emboro awa Samaria busu da awodo diugedo mambari ra.

⁵ Edo Iesu umo Samaria busu awa sembuse umo Sychar nati da bugusira. Edo nati eiawa Jacob mi uso mei Joseph da busu ititisira awa aikambu. ⁶ Edo Jacob da umo koto ngambari awa ainda atima isira edo ainda waiko soropu da Iesu yei ribori be pepeta edo bugusira awasedo begogo etiri umo koto ngambari demoda anumburisira.

⁷ Edo Samaria busu evetu da awa umo dimbadi bugiri Iesu mi evetu ainda yei sisira, “Na umo itigae indane.” ⁸ Edo Iesu umo umosuka ainda anumbedo atisira edo uso ambojimbini awa indari ori ari yei da indari ori adi mambusera.

⁹ Edo Iesu evetu ainda yei umo nganega etiri evetu awa kove be isira ainda be awa Jew embomei de Samaria busu embomei de awa gitopo mina ara edo era awasedo. Edo evetu amimi Iesu da yei sisira, “Na awa Samaria busu evetu ra edo imo awa Jew embo ra edo ro edo imo naso yei ge sesi?”

¹⁰ Setiri Iesu mi mina sisira, “Imo rora kando ewamei God mi iso yei itadi dipapa ira awa gido edo na embo amemi iso yei umo embo seni awa gido re imo naso yei sedo gaso iso yei boroko umo evevegari sago ae umo awa itae etena.”

¹¹ Edo Iesu awodo setiri evetu amimi sisira, “Umo koto re tu be tu da ra edo imo umo dimbari rora ae ra. Edo umo evevegari sago ae emomo rawainda besi? ¹² Edo nangoda umbogo Jacob mi umo koto emone ngambusira. Edo umo de uso memei de uso wo mane de awa umo eiawa

indisera. Edo umo inemi itadesa amimi mana Jacob mi nangoda umo ititisira awa derigadira.”

¹³ Edo evetu awa awodo setiri Iesu mi mina sisira, “Embo ave umo eiawa indadera awa sekago umo ujo adira te embo ave umo nanemi itadena awa indadera awa mana umo ujo sekago tambadera. ¹⁴ Edo umo nanemi itadena amone wasiri natopo atari ra. Edo wasiri natopo atari nanemi itadena amone embo da jo da teta umo uriri iji berari busu tu da vitido ira da awodo ra.”

¹⁵ Edo Iesu awodo setiri evetu mi sisira, “Atopatari umo awa naso yei itigae. Edo imo umo awa naso yei itadesa awa na mana sekago umo dipapa adena. Edo na umo ujo ae ari gido ainda mana sekago umo dimbadi mana bugadena.”

¹⁶ Edo evetu awa awodo setiri Iesu mi uso yei sisira, “Mambuio iso iu budo sekago ainda engenembase.” Setiri evetu amimi sisira, “Na iu aera.”

¹⁷⁻¹⁸ Setiri Iesu mi mina sisira, “Imo sesa imo iu ae awa imo gebe setesa ko imo matu iubono da da jimbuse bugudo ingo da isesa edo embo imo boroko daga atesa awa iso iu aera. Awa imo gebe setesa.”

¹⁹⁻²⁰ Edo Iesu awodo setiri evetu mi mina sisira, “Embo na boroko gosena imo awa God da binga sari embo ra. Edo naso Samaria busu da ewowo mamatu awa God doriri ainda tumondebain edo isera te ingo Jew embobo mi sedo ewa Jerusalem nati da nango God tumondebain orase sedo ewa.”

²¹ Edo evetu awodo setiri Iesu mi uso yei sisira, “Evetu na gebe eio, iji bugutira ainde embo mi mana God awa dorir ainda edo Jerusalem nati da ta awodo tumondebain adera. ²² Edo

ingo Samaria busu embobo awa ingo ave tumondebain evi awa ingo gae ra te nango Jew embobo awa nango embo ave tumondebain eri awa gosera ainda be awa soregari embo awa Jew embo nei na. ²³ Awarate iji bugira edo iji amboda bugadira ainde awa embo amemi jo uso berari mi God tumondebain adira awa asisi ungodada mi berari tumondebain adera. Edo embo emone God mi umo tumondebain orase dipapa ira awa ra. ²⁴ God awa asisi ewamei ra awasedo embo mi asisi ungodada mi umo tumondebain adera.”

²⁵ Edo Iesu awodo setiri evetu mi uso yei sisira, “Na gosena Keriso soregari embo God mi itari bugarase sisira awa bugadira. Edo umo bugudo iji ainde unemi ingodena berari da yei rora berari awa sari gadera.”

²⁶ Edo evetu awodo setiri Iesu mi mina sisira, “Embo imo amende sesa amone namona. Na iso yei ge sena embo re awara.”

²⁷ Edo Iesu evetu ainda yei awodo siri uso ambojimbibi engeneburisera. Edo ungo engenembedo umo evetu ga ge siri gido ungo kove be isera. Te ungo umo ro dipapa isiri edo umo evetu ainda yei ge ro edo siri awa nganega ari ujo ae isera.

²⁸⁻²⁹ Edo evetu awa uso utingi ainda dodo nati nembodiba da engenembedo mambudo embobo da yei sisira, “Embo da mi na matu ro ewona awa setiri getena pou umo gave. Edo ingo kotewa embo awa God mi soregari embo itari bugarase sisira awa ta rora?” ³⁰ Awasedo umo awodo setiri ungoi berari nati nembodiba awa dodo Iesu da yei mambusera.

³¹ Edo evetu awa nati da mambutiri uso ambojimbimi mi Iesu da yei sisera, “Atopatari indari indi.”

³² Setero umo mina sisira, “Naso indari indadana amone atira te awawa rori awa ingo gae ra.”

³³ Setiri ambojimbimi mi mina sara isera, “Embonei mi uso yei indari budo bugeri ta?”

³⁴ Sero ge awa ingido Iesu mi ungodaya yei sisira, “Na embo amemi itiri bugusena awa kera adena edo unemi ro anase itisira buro awa atae adena. Edo na awodo adena awa naso indari adira.

³⁵ Edo ingo ingosuka sedo ewa, ‘Kariga 4 atae ari iji ainde awa ingodenaso indari sari ari ingode indari be badera.’ Edo ingo awodo sedo ewa te na ingoda yei sena indari buro da awa gido gogo ewo ko indari awa sari edo bawase sia etira.

³⁶ Edo indari be sari etira awa teta busu da embo ingo mi naso yei budo bugawase simba edo era da awodo ra. Edo embo amemi dada adira awa mina ewamei badira. Edo umo embomei awa budo naso yei bugari wasiri natopo badera. Edo embo ave gowuri edo embo amemi dada edo ira embo etoto awa iaviri adera. ³⁷ Embo mi eiawa sedo era, ‘Embo da mi gowuri edo embo nei mi dada edo ira.’ Ge awa gebe ra. ³⁸ Nanemi ingo buro da aindaiteno mambewa ingo matu aindaiteno mambewa. Edo embo nenei mi God da ge awawa atopapotisera te ingo amboda bugudo kondade etewo ge aindaiteno mambewa. Edo ingo awodo isewa awawa teta embo buro da indari dada edo era awodo isewa.

³⁹ Edo Samaria busu embo jiwae nati nembodiba aindaiteno mambewa ingo matu aindaiteno mambewa. Edo embo nenei mi God da ge awawa atopapotisera te ingo amboda bugudo kondade etewo ge aindaiteno mambewa. Edo ingo awodo isewa awawa teta embo buro da indari dada edo era awodo isewa.

ainda be awa evetu amimi sisira, “Unemi na matu ro ewona awa setiri getena.” ⁴⁰ Awasedo Samaria busu embobo mi Iesu da yei bugudo daedo atarase sisera. Edo ungomi sedo getero Iesu ainda iji etoto atisira.

⁴¹ Edo embo jiwae Iesu da binga ingido umo gebe isera. ⁴² Edo ungo mi evetu ainda yei sisera, “Nango inemi ro setesa awa gido Iesu awa gebe ae rate nango Iesu awa gebe era awa nango nasuka Iesu da ge ingera amimi gera awa umo awa busu da embobo da soregari embo ra.”

IESU GITIJIGARI DA MEI EWAMEI ISIRA

⁴³ Edo Iesu iji etoto yei ainda atiko Iesu yei awa dodo busu Galilee da ainda mambusira. ⁴⁴ Edo umo nati awa doadi ise Iesu mi sisira, “Binga sari embo da busu topo embo awa umo sapo ae edo era.” ⁴⁵ Edo umo Galilee busu da bugiri embo mi umo atega isera ainda be awa ungo Jerusalem jarusegari bondo da mambudo Iesu umo ro bondo iji de etiri gosisera awasedo.

⁴⁶ Edo Iesu umo Galilee busu da edo Cana nati da sekago mambusira nati umo etiri wareregedo grape be da ngamo isira ainda. Edo gitijigari nati ainda esega ira ainda mei awa karu edo betadi aikambu isira. ⁴⁷ Edo gitijigari awa Iesu Judea busu awa dodo Galilee busu da bugutira awa binga ingido Iesu gadi mambusira. Edo umo uso yei mambudo Iesu Capernaum nati da mambudo uso mei betadi aikambu ira awa ari ewamei arase sisira.

⁴⁸ Edo Iesu mi uso yei sisira, “Imo nanemi ari wasiri goroba de ano gae edo imo mana na gebe ae etesa.”

⁴⁹ Setiri gitijigari mi sisira, “Atopatari naso mei betae atira aingo de nangae pogae.”

⁵⁰ Setiri Iesu mi uso yei sisira, “Mambuio iso mei ewamei etira.”

Edo Iesu awodo setiri embo awa Iesu da ge awa ge be edo gido umu mambusira. ⁵¹ Edo embo awa uso nati da mambutiri embo ainda agipo embobo mi umu tambudo sisera, “Iso mei ewamei etira.” ⁵² Setero embo amimi nganega isira iji nonde uso mei ewamei etiri awa nganega isira. Nganega etiri ungoi mina sisera, “Sipe ongobo awodo yauya umu dotiri umu ewamei iutara.”

⁵³ Edo mei ainda mammo kotemburisira iji ainda Iesu mi uso yei sisira uso mei ewamei etira awasedo embo ainde uso orobe berari de awa Iesu gebe isera.

⁵⁴ Edo Judea busu awa dodo Galilee busu da bugusira edo Iesu boroko iji einde awa ari wasiri goroba de etoto isira.

5

IESU MI EMBO KAVIEGURISIRA

¹ Einda amboda Iesu engenembedo Jerusalem nati da mambusira ainda Jew embobo awa bondo da iji gido bondo ero. ² Edo Jerusalem nati ponda awa puga mi jiroroka ari ra edo be da ainda jawo awa wo sheep da be ra. Edo be demo da awa umu jiroroka ari Hebrew ge mi sedo era Bethesda. Edo umu awa jiroroka ari awa tendeba 5 awodo ra. ³⁻⁴ Edo karu embobo jiwae be diti guba ari tei ingo ambari embobo edo embo pepeta ari sago egeregae de awa tendeba ainda paposigedo

atima isera. Edo ungo ainda paposigedo simba atima isera umo awa wasiri arase ainda be awa iji dada asisi mi euri awa edo isira. Edo umo wasiri irirari embo amemi umo ainda wosadera awa sekago ewamei adera. ⁵ Edo embo da awa gaeko 38 karu edo atima isira awa ainda pasido atisira. ⁶ Edo Iesu embo awa pasido atiri gosisira edo embo awa gaeko tupo atae karu edo atima isira awasedo uso yei nganega isira, “Imo sekago ewamei adi dipapa esi ta?”

⁷ Setiri karu embo amimi mina sisira, “Atopatari sasaka eiawa wasiri edo ira awa embo mi na kondade oro umo da wosane sae edo era. Edo na wosadi jaronu embo nei mi na derigedo edo giti wosedo era.”

⁸ Edo embo awa awodo setiri, Iesu mi uso yei sisira, “Erido iso ewari besi budo edo pepeta eio.” ⁹ Edo Iesu awodo setiri burigi be embo awa ewamei isira. Edo umo ewamei edo uso ewari besi budo pepeta adi tuturo isira.

¹⁰ Edo wasiri eiawa isira iji awa Jew embomei da tumondebain ari iji de isira awasedo Jew embobo da babojegari mi Iesu mi etiri ewamei isira embo ainda yei sisera, “Imo iso besi budo pepeta esa amimi nangoda agodari bejetesa ko boroko awa mamaso ari iji ra.”

¹¹ Edo ungo awodo setero embo amimi mina sisira, “Embo na etiri ewamei etena amimi naso besi budo pepeta anase setiri ena.”

¹² Setiri ungomi uso yei nganega isera, “Embo mo amemi eiedo asase setiri?”

¹³ Awarate embo Iesu mi etiri ewamei isira awa Iesu mo averi awa gae ainda be awa Iesu embo jiwae be da teda awasedo.

¹⁴ Edo amboda Iesu embo awa Jew embobo da tumondebain ari oro da tambudo uso yei sisira, “Naso ge ingio imo awa ewamei edo atesa awasedo iso wasiri biae awa jamo eio. Edo imo iso wasiri biae awa jamo ae adesa awa wasiri biae nembodiba mi iso karu matu awa derigadira.”

¹⁵ Edo umo awa setiri embo awa dodo mambudo Jew embobo da gitijijigegari da yei mambudo embo amemi umo etiri ewamei isira embo awa Iesu ra sisira.

¹⁶ Edo umo ungodu yei awa setiri ungoi Iesu buro awa isira tumondebain ari iji de embo etiri ewamei isira awa bekuba isera. ¹⁷ Awarate Iesu mina ungodu yei sisira, “Naso Mama awa iji berari buro ira awasedo na daedo naso buro awa mana jamo adira.”

¹⁸ Edo umo awodo setiri Jew embobo da gitijijigegari umo doro betarase dipapa isera ko ungomu sisera umo tumondebain ari iji da wasiri awa ambo ambo ae ira edo ko umo sira God awa uso mamu edo umo sira umo awa God ga da inono na.

IESU DA GOROBA

¹⁹ Edo Iesu ungodu bekuba isera ainda mina awa sisira, “Na ingode yei gebe sena mei mana uso kotari buro awa ambo ambo ise adira. Ro uso Mamu mi iri gosira awa umone ira. Ro Mamu mi ira da awodo awa mei da awodo ira.

²⁰ Edo Mamu uso mei dubo budo ira awasedo ro umo umosuka ira awa uso mei da yei isaga edo ira. Awarate umo wasiri nenei embo etiri ewamei etira awa derigedo adira awa uso mei mi arase itari bugadira. Edo eiawa irirari gido ingo kove be adewa. ²¹ Edo Mamu bebetegari jigari

eroro wasiri de atorase itido ira da awodo mei umo amenda yei wasiri itari dipapa adira ainda itadira. ²² Edo Mamo umo umosuka embo kasae ra te uso mei de da embo kasarase goroba ari ititisira. ²³ Edo Mamo awodo edo ari embo mi mei sapo adera teta ungo Mamo sapo edo era da awodo. Edo embo ave mei sapo ae edo era awa Mamo umo itiri bugusira awa sapo ae edo era.

²⁴ “Na ge be sena, embo ave naso ge ingise amemi na itiri bugusena awa gebe edo ira embo awa gebe ira iji ainde wasiri natopo atari budo ira edo God mi mana umo kasadira. Edo uso asisi awa teta bebetisira da awodo rate boroko wasiri seka bugira. ²⁵ Na ingoda yei gebe mi sena. Embo de evetu de boroko atera awa teta bebetegari embobo da awodo rate iji bugadira iji ainde ungo mi God da mei da ge ingadera. Edo ungo mi uso ge ingise ungo sekago wasiri de eradera. ²⁶ Edo Mamo awa wasiri da susu na da awodo Mamo mi uso yei goroba ari itari edo mei awa wasiri itari susu etira. ²⁷ Mamo mei da yei kasari da goroba awa itira ainda be awa umo awa God da mei awa embo isira.

²⁸⁻²⁹ “Edo iji bugutira iji ainde embo bebete-guriserawo awa uso ge da javi ingido edo ungodawo uje dodo eririgadera. Edo iji ainde awa ari gido kowe eowe. Embo ave ewamei eworawo awa erido wasiri de atadera te embo ave biae eworawo awa eroro God mi ungo kasadira.

GOD MI IESU UMO AVERI AWA ISAGA IRA

³⁰ “Na naso goroba mi mana buro da ro adena. Edo na embo kasae giti da awa Mamo da yei sedo gido ena. Sedo gido awa kasedo ena. Edo naso kasari awa ewamei na ainda be awa na naso

dipapa awa adi jarae rate embo amemi na itiri bugusena amimi dipapa ira awa edo ena.

³¹ “Na ingoda yei na rawodo ri awa sadena awa ingo na gebe adi ae ra. ³² Awarate embo nei mi ingoda yei na rawodo ri awa gebe siri gosewa awa God ra. Na gosena naso jawo da ro sira amone ge be ra.

³³ “Ingo ingoda agipo embobo John da yei na rawodo ri awa nganega orase itewo mambusera. Awodo da naso ge be awa gosisewa. ³⁴ Awarate embo mi naso jawo da ro sira amone inono aera te nanemi ingoda yei na sena John ingoda yei naso jawo da ge sisira amone ge be ra edo ingo na gebe adewa awa God mi ingo soregadira awa ruvegeove sena. ³⁵ John ingoda yei ge sisira awa teta usasa nembodiba da awodo ra. Iji tupo ingo iaviri etewa ainda be awa be usasa nembodiba etira awasedo.

³⁶ “Awarate rora nei mi na rawodo ri awa gebe sedo John da ge awa derigurira. Naso ari wasiri goroba de nanemi ena emimi na averi ena awa isaga ira. Edo wasiri goroba de emimi gebe ira awa Mamo mi na itiri bugusena. ³⁷ Edo Mamo na itiri bugusena uso dombu awa ingo gae edo uso ge javi awa ingo ingae rate umo daedo na averi awa be isaga edo ira. ³⁸ Awarate ingo God da ge ingae ewa ainda be awa na embo God mi ingoda yei uso binga de itiri bugusena awa ingo ge be ae ewa. ³⁹ Ingo jiwari awa ajigedo ewa ainda be awa ingo kotewa wasiri natopo atari rawodo badevi awa kotewa. Edo jiwari mi namomo averi awa ujugurira ⁴⁰ Awarate ingo naso yei purirowo

nanemi wasiri natopo atari itano bae dodo edo ewa.

⁴¹ “Na embo mina jasiga orase eura ae ra. ⁴² Na ingo gari ra. Na gari God da dubo bari awa ingoda jo da atae ra. ⁴³ Na ingoda yei God da jawo da bugusena te ingo na ujo ae edo ewa. Edo iji amboda embo nei uso jawo topo da bugadira awa ingo mana embo awa ujo ae adewa. ⁴⁴ Ingo awa embo mi ingo awa jasiga orase dipapa edo ewa te God mi ingo dipapa arase awa ujo ae edo ewa. Edo ingo ari awodo edo ewa amimi na gebe ae edo ewa.

⁴⁵ “Awarate nanemi ingo awa naso Mama da yei bekuba adi ari ge seove. Moses ingo gebe edo ewa embo re amimi ingo bekuba adira. ⁴⁶ Awarate ingo Moses gebe mi gebe ae etewa awa ingo na gebe ae etewa ko Moses awa naso jawo da ge jiusira. ⁴⁷ Edo ingo ro Moses mi gaisira awa ge be ae edo ewa awasedo ingo na ro sena awa gebe ae ewa.”

6

IESU EMBO JIWAE DA YEI INDARI ITITISIRA

¹ Amboda Iesu Galilee umo diuga awa sembusira daedo sedo era Tiberias umo diuga. ² Edo embo jiwae be umo ambo ambo isera ainda be awa ungomi uso ari wasiri goroba de embo karu egeregari etiri ewamei isira awa gido. ³ Edo Iesu doriri da vitido uso ambojimbi de anumburisira. ⁴ Edo jarusegari bondo iji awa aikambu isira.

⁵ Edo Iesu diti pigedo embo jiwae be uso yei bugutero gido Philip da yei sisira, “Ingode indari inono da yei rawainda ori oro embo berari eiawa

inderi?” ⁶ Edo Iesu umo umosuka ro adiri awa gosisira te umo sedo gari eiawa Philip da yei umo ro adiri awa gadi sedo ititisira.

⁷ Edo Iesu awodo setiri Philip mi mina sisira, “Na kotena ingode indari K200 mi badera amone embo berari emimi indadera awa inono ae ira.”

⁸⁻⁹ Awarate uso ambojimbi nei Andrew Simon Peter da namendi mi sisira, “Mei kiambu da einda ambe ingari 5 edo wo etoto de ra te emo berari eiawa na kotena mei kiambu einda uso indari de inono ae ta rora.”

¹⁰ Setiri Iesu mi ambojimbi da yei sisira, “Embo sewo anumbore.” Edo sasawa jiwae ainda atima isira awasedo embo berari anumburisera. Embo berari ainda teda awa embobo 5,000 ra. ¹¹ Edo embo anumbetero Iesu ambe budo God da yei ategari itido embo berari ainda anumbedo atisera ainda kando isira. Da awodo umo wo kando isira. Edo embo berari indari ungo dipapa isera awa budo inono isera.

¹² Edo embo berari indido inono etero Iesu mi uso ambojimbi da yei sisira, “Embo mi ito kato indae dotera awa dada ewo. Ingode mana tepo tapo adera.” ¹³ Awasedo ambojimbi erido embo mi indari indae doturigurisera awa dada edo kandia 12 awa beda isera.

¹⁴ Edo embo mi Iesu mi ari wasiri goroba de isira awa gido ungomi sisera, “Gebe embo emone God da binga sari embo ingode simba ewora awa ra.” ¹⁵ Edo ungo awa sero Iesu ungo gosisira ungo Iesu ujo ae irirari dodo umo budo oro ungod a gitijigari nembodiba arase era awa gido umo umosuka doriri inda mambusira.

IESU AMBOJIMBI SOREGURISIRA

16-17 Ongobo etiri uso ambojimbi umo diuga da wosedo nga da vivitigedo Capernaum nati da mambadi dipapa edo gido ungoi umo diuga awa sembadi tuturo isera. Edo tumba jijirisira te Iesu ungodu yei bugae ra. ¹⁸ Edo iji ainde bisara nembodiba sumbusira edo umo awa teta ewa yawata ari inge isira. ¹⁹ Edo ambojimbi ungo davedo 5 ta 6 kilometre awodo edo ungomu Iesu gosisera. Umo umo tamo da pepeta edo nga aikambu bugutiri ungo oju isera. ²⁰ Edo Iesu mi ungodu yei sisira, “Amone namone oju eove.” ²¹ Setiri ungo awara setero umo nga da vivitisira. Edo umo nga da vivitisira iji ainde amimi ungo busu ungo mambadi dipapa isera awa burisera.

IESU EMBO ATOPAPOTISIRA WASIRI DA INDARI BE AWA

²² Iji nei embo jiwae be umo be nei da aitsera awa Iesu eura isera. Edo ungo gosisera Iesu uso ambojimbi ainde bugusira awa edo ungo gosisera Iesu uso ambojimbi umo dodo ungodu nga de mambutitara. ²³ Awarate Tiberias nati embobo nenei da nga awa bugudo umo bengi da yei Bada mi indari budo ategetiri edo embo mi indisera ainde demo da atisera. ²⁴ Awasedo embo jiwae mi Iesu ainde gae edo uso ambojimbi ainde gae edo gido ungomu nga da vivitigedo Capernaum nati da Iesu eura adi sedo mambusera.

²⁵ Edo ungomu Iesu umo diuga da be nei da gido uso yei sisera, “Atopatari imo nanjigo einda bugutasi?”

²⁶ Setero Iesu mi mina sisira, “Na ingoda yei ge be sena ingo na eura ewa ainde be awa nanemi ingoda yei indari iteno indido inono ititawa

awasedo. Awarate ingo naso ari wasiri goroba de awa gido na ge be aera. ²⁷ Edo indari atae adira awa sedo buro eove ta wasiri natopo atari da indari awa embo buro ewo. Indari eiawa na God da mei embo isena amimi itadena ainda be awa God Mamo mi naso yei eiawa anase goroba ari ititisira.”

²⁸ Awasedo ungomi umo nganega isera, “Nango God oro dubo ewamei arase mo buro ro eri?”

²⁹ Setero Iesu mi mina sisira, “God mi embo ingoda yei itiri bugusira awa gebe ewo edo buro re awawa God mi awase dipapa ira.”

³⁰ Edo umo awodo setiri ungo mi mina sisira, “Ari wasiri goroba de inemi mo ro esi? Nango ari wasiri goroba de gadera awa nango gebe adera.

³¹ Nangoda mamoubogo ari wasiri goroba de awa yei ro erae da gosisera. Ungo ambe indido isera jiwari mi sira awodo, ‘Unemi ambe utu da edo ituri indido isera.’ ”

³² Edo ungo awodo setero Iesu mi sisira, “Na ingoda yei ge be sena ro Moses mi ingoda yei ititisira awa utu da ambe aera. Naso Mama mi utu da ambe be awa itido ira. ³³ Edo indari God mi itido ira awa embo utu dodo wosedo busu da embo da wasiri itido ira awa ra.”

³⁴ Edo Iesu awodo setiri ungo mi uso yei nganega isera, “Atopatari iji berari indari eiawa nangoda yei itido egae.”

³⁵ Setero Iesu mi ungodu yei sisira, “Na awa wasiri be da susu da indari ra. Edo embo indari inono indadira awa umo mana beji tambadira da awodo embo ave naso yei puradira awa mana uso jo da beji tambadira. Edo embo ave na gebe adira awa mana umo ujo tambadira. ³⁶ Edo na

ingoda yei matu seteno gosisewa ingo na gosise atima ewa te na ge be ae edo ewa. ³⁷⁻³⁸ Embo berari naso Mama mi naso yei ititira awa naso yei puradera. Edo embo ave naso yei puradera awa nanemi mana ujo ae adena ko na utu dodo wowosisena awa ro God mi anase dipapa ira awa adi. Edo na wowosisena naso dipapa awa adi wosae. ³⁹ Edo God na ro anase dipapa ira re eire embo berari naso yei ititisira edo nanemi simba anase dipapa ira gaegae edo munene georase. Edo nanemi iji sangove da jigano erido wasiri natopo atari badera. ⁴⁰ Edo naso Mama awa embo ave na uso mei awa gosise edo ge be edo era awa wasiri natopo atari awa borase dipapa edo ira. Edo amone uso dipapa ra nanemi ungo iji sangove da jigano eradera awa.”

⁴¹ Edo Jew embobo Iesu da yei dumo ge sadi tuturo isera ainda be awa unemi sisira, “Na awa ambe utu da edo wowosisena.” ⁴² Awasedo ungomi sisera, “Embo emone Joseph da mei na. Nango uso ai de mamode gari ra. Edo rawodo edo umoboroko siri umoutu da edo wosari siri?”

⁴³ Setero Iesu mi ungodayeisira, “Ingo ingosuka dumomina ara eove. ⁴⁴ Embo da mana uso goroba mi naso yei puradira te Mamona itiribugusena amimi umojumbadira awa umonaso yei puradira awa iji sangove da awa nanemi umojigano erido edo wasiri natopo atari badira. ⁴⁵ Edo bingasari embobo mi gaisera, ‘God mi embo berari atopadira.’ Edo embo berari God mi atopapotira embobo awa ungo uso ge ingadera awa naso yei puradera. ⁴⁶ Edo na embo mi God gari awa sae ra. Na nasuka utu dodo

wowosisena awa Mamo gosisena. ⁴⁷ Edo na ingode yei ge be sena embo ave boroko na ge be ira awa wasiri natopo atari burira. ⁴⁸ Na awa wasiri da ambe. ⁴⁹ Edo ingoda mambo umbogo yei ro erae da pepeta isera awa God mi indari itido isira awa indido isera te amboda ungo teta embo berari betedo era da awodo bebetisera. ⁵⁰ Awarate ambe nei God mi itiri bugusira awa embo amemi ambe eiawa indadira awa amimi ari umo wasiri natopo atari badira. ⁵¹ Na awa wasiri ainda ambe da be ra awa utu dodo wowosisena. Edo embo ave ambe eiawa indadira awa wasiri de natopo atadira. Naso tamo awa ambe eire edo nanemi busu berari da embo awa soregadi itadena.”

⁵² Edo Iesu awodo setiri edo Jew embobo tini gambari edo ungo ungosuka ge bagisera. Edo sisera, “Rawodo edo embo eiawa uso tamo awa itari ingode nanemi inderi?”

⁵³ Edo ungo awodo setero Iesu mi ungodu yei sisira, “Na ingoda yei ge be sena ingo God da mei bugudo embo isira ainda tamo indae edo uso ororo ingo indae awa wasiri natopo atari awa ingoda jo da mana atadira. ⁵⁴ Edo embo ave naso tamo de ororo de indadira boroko wasiri de natopo atadira. Edo iji sangove de nanemi umo jigano erido mata awodo atadira. ⁵⁵ Naso tamo awa indari be edo naso ororo awa umo be ra. ⁵⁶ Edo embo ave naso tamo indido edo ororo indido adira na uso jo da atinono edo umo naso jo da atadira. ⁵⁷ Edo Mamo atira amimi na itiri bugusena. Edo umo atira awa naso wasiri da susu ra. Da awodo embo ave ge be edo ira awa na umo awa embo betadena edo embo ainda yei awa na awa wasiri da susu adena. ⁵⁸ Na awa utu

da ambe be ra. Edo na awa ambe ingoda mambo umbogo mi indisera awodo ae ra. Ungo ambe awa indido amboda embo betedo era da awodo bebetegurisera awarate embo ave na umo embo betadena awa gebe adira awa wasiri de matawa atadira.”

⁵⁹ Iesu umo Jew embobo da dada ari oro Capernaum nati da awa esega ise embo da yei ge eiawa atopapotisira.

IESU DA AMBOJIMBI JIWAEE JAMO JAMO EDO UMO AMBO AMBO ISERA.

⁶⁰ Iesu atopatari awa atae etiri uso ambojimbi jiwae be mi sisera, “Uso atopatari awa nango gari sago ae be era. Amemi uso ge eiawa ingeri?”

⁶¹ Edo uso ambojimbi mi Iesu da yei sae rate Iesu ungo ge gugumo gagumo mina sara isera awa gido ungodu yei sisira, “Ro nanemi setena emimi iri ingo ge jiwae sise edo tini gambari evi ta? ⁶² Edo na God da mei bugudo embo isena awa sekago utu da engenembedo mambano mo ingo mo ro kotae etevi? ⁶³ Edo Asisi Kotopu awa wasiri da susu ra. Edo embo da uso goroba mi mana wasiri be awa mana uso yei itadira te ge nanemi ingoda yei setena amimi emboro rawodo edo wasiri be awa badevi awa ujugurira.

⁶⁴ Awarate ingo embo nenei awa ingewa te ge be ae ewa.” Tuturo be tuturo da awa Iesu embo ave ge be adiri edo embo amemi umo indiga sadi iri amone gosisira. ⁶⁵ Edo Iesu ge nei sisira, “God mi embo da awa naso yei jumbari puradira te embo da ainda uso goroba mi mana naso yei puradira awasedo na ingoda yei ge awa setena.”

⁶⁶ Edo Iesu ge awa setiri uso ambojimbi jiwae be dodo wareregedo umo ambo ambo ae isera.

⁶⁷ Awasedo Iesu uso ambojimbi 12 ainda yei sisira, “Edo ingo giwo ingo daedo na ambo ambo ae doevita?”

⁶⁸ Setiri Simon Peter mi mina sisira “Bada nango imo ambo ambo ae doadera mo amenda yei mamberi? Imo awa embo da wasiri edo inemi wasiri natopo atari awa nangoda yei atopatido esa. ⁶⁹ Edo nango imo gebe era edo nango gosera imo awa God da mei buria ae de ra.”

⁷⁰ Edo Peter awodo setiri Iesu mi mina sisira, “Nanemi ingo embo 12 awa jawo seteno edo na ambo ewa te ingo embo da awa Satan da ambojimbi ra.” ⁷¹ Edo Iesu ge sisira awa Judas de sisira Simon Iscariot da mei ko Judas awa ambojimbi 12 ainda embo nei na edo amboda awa unemi Iesu indiga sadira.

7

IESU DA NANONAMENDI DAEDO GE SISERA

¹ Amboda Iesu Galilee busu da pepeta ise tembusira. Edo umo Judea busu da pepeta ari ujo ae isira ainda be awa Jew embobo da gitijjigegari awa umo doro betarase dipapa edo isera awasedo. ²⁻³ Edo umo awodo iri edo Jew embobo da bondo jawo yagara da bondo da iji awa aikambu isira awasedo Iesu uso nanonamendi mi uso yei sisera, “Yei eiawa dodo Judea busu da mambuio edo iso ambojimbi mi imo buro ro esa awa gore. ⁴ Edo embo da ave embo mi umo gorase dipapa edo ira awa uso buro awa unjugari da ae edo ira. Edo imo ari wasiri jiwae eiawa

esa awasedo egae busu da embo berari mi imo ro esa awa gore.”⁵ Edo uso nanonamendi ge awodo sisera ainda be awa ungo umo gebe ae edo isera awasedo.

⁶ Edo Iesu mi ungodu yei sisira, “Naso iji awa bugae ra awarate imo iji nonde mambadevi amone tepo ra. ⁷ Embo de evetu de ingo ujo ae aera te ungo na ujo ae edo era ainda be awa na ungo wasiri biaie era awa sedo ena awasedo. ⁸ Awasedo ingo bondo da mambuwo. Na bondo einda mambadi aera ainda be awa naso iji awa bugae awasedo. Amboda awa na mambadena.”⁹ Edo Iesu awodo sedo umo Galilee busu da atisira.

IESU BONDO DA MAMBUSIRA

¹⁰ Edo Iesu uso nanonamendi bondo da mambero Iesu daedo amboda mambusira te umo isaga da mambae ra te gae unjugari da mambusira. ¹¹ Edo Jew embobo da gitijijigegari bondo yei da umo eura ise sisera, “Umo mo rawari?”

¹² Edo embo jiwae be ainda atisera amimi ungosuka uso jawo da ge dengoro da mina sara edo isera. Edo embo nenei mi sisera, “Umone embo ewamei na.”

Awarate embo nenei mi sisera, “Awodo aera umone embo da yei ge busira.” ¹³ Edo ungo ge dengoro da mina sara isera awa ge unjugari da sisera ko ungo Jew embobo da gitijijigegari awa oju isera.

¹⁴ Edo bondo soropu da Iesu Jew embobo da tumondebain ari oro da embo atapotadi tuturo isira. ¹⁵ Edo Jew embobo da gitijijigegari uso ge ingido kove be isera. Edo sisera, “Embo eiawa

gari mo rawainda burisiri? Edo umo ingodenaso gari eura edo era yei einda bugae ra.”

¹⁶ Setero Iesu mi mina sisira, “Na ro atopapotena awa naso atopatari aera. God na itiri bugusena amimi jiro gari eiawa naso yei itiri na atopapotena. ¹⁷ Edo embo ave God ro dipapa ira awa adi dipapa edo era awa na naso gari topo mi atopapoteni ta ko God mi naso yei atopatari eiawa itiri einde be awa gadera. ¹⁸ Edo embo awa uso kotari awa atopapotira awa embo nenei mi umo jasiga orase dipapa edo ira awarate embo ave atopapotise edo embo mi God jasiga orase dipapa edo ira embo amone ge be embo edo embo ewamei na. ¹⁹ Ingo berari Moses mi agodari ititisira awa gari ra te ingo berari agodari awa kera ae edo ewa. Ro edo ingo na dawo betanase dipapa evi?”

²⁰ Edo Iesu awa setiri embo jiwae be mi uso ge mina sisera, “Asisi biae iso jo da atima ira. Amemi imo dadi dipapa eri?”

²¹⁻²² Edo ungo awodo setero Iesu mi mina sisira, “Jew embomei da tumondebain ari iji de na ari wasiri goroba de da isena edo iji ainde ingo kove be isewa. Awarate ingo daedo mamaso iji de buro edo ewa. Ingoda mamu umbogo matu Moses atae iji de atima isera amimi tamo da andiso awa diwari da wasiri awa tuturo isera. Edo Moses daedo setiri ingo ingoda memei da tamo da andiso awa didivegurisewa. Edo ingo mamaso iji de ingoda memei da tamo da andiso diwari awa awara sedo ewa. ²³ Edo ingo tumondebain ari iji de ingoda memei da tamo da andiso diuse edo ingo Moses da agodari bejae sedo ewa mo

roedo ingo na tumondebain ari iji de embo eteno ewamei isira awasedo bekuba evi? ²⁴ Edo emboro ingo gosewa awodo da kasove ta emboro God mi kotira awodo da kasewo.”

EMBO KOVE BE ISERA

²⁵ Edo Jerusalem nati embo nenei mi sisera, “Embo doro betarase jarera amone eire. ²⁶ Edo giu umo embo isaga da atopapotira edo embo mi umo beutigadi jarae dodo era. Edo gitijijigegari embo eiawa God mi itari bugarase sisira awa kotise eri ta? Awodo kotise eri ta rora. ²⁷ Awarate embo God mi itari bugarase sisira awa bugadira edo iji ainde ingodena uso nati mo rawari awa gadi aera te ingode na uso nati rawari amone gosera.”

²⁸ Edo Iesu umo Jew embobo da tumondebain ari oro da atopapotise umo gogo dimbudo sisira, “Ingo na averi edo naso nati rawari mo ingo mo gari ta? Na naso jawo naso topo da bugae ra. Edo embo amemi na itiri bugusena awa ge be ra. ²⁹ Edo ingo umo gae ra te na umo gari ra ainda be awa na unemi itiri bugusena embo awa matu ungae atima isena.”

³⁰ Setiri ungoi umo sandadi dipapa isera te uso iji bugae awasedo ungo ungodu ingo mi umo jigari awa jarisera. ³¹ Awarate embo jiwae be ainda atisera awa umo ge be edo sisera, “Embo God mi itari bugarase sisira embo eiawa simba edo ewa edo ingo kotewa uso ari wasiri mi embo ainda ari wasiri goroba de awa derigeita?”

ISORO EMBOBO ITERO IESU BUNDADI BUGUSERA

³² Edo Pharisee embobo mi embo jiwae be Iesu da jawo da ge dengoro da mina sara ero gido, priest babojegari mi isoro embobo itero Iesu bundadi mambusera.

³³ Edo ungo bugero Iesu mi sisira, “Na ingode iji nei riborigo atadena edo ingo dodo na embo amemi itiri bugusena embo ainda yei engenembadena. ³⁴ Edo iji ainde ingo na eura adewa te ingo na mana tambadewa ainda be awa na yei rawainda mambadena ainda ingo mana mambadewa.”

³⁵ Awa setiri Jew embobo da gitijijigegari mi sisera, “Umo yei rawainda mambari ingodena umu eura edo umotambadi ae orase siri? Edo Jew embo nenei awa yei nenei da edo embo Jew ae ainda nati da atima isera. Edo Iesu mo nati ounda mambudo embo Jew ae awa atopatadi sita? ³⁶ Edo umu sira ingo na eura adewa te na mana tambadewa sira. Edo na yei mambadena ainda ingo mana mambadewa sira. Edo umu awodo sira ainda ge be mo rori?”

IESU UMO BE DA GE SISIRA

³⁷ Edo bondo da iji sangove awa be iji nembodiba be ra. Edo iji awa bugiri Iesu erido gogo dimbudo sisira, “Embo ave umu ujo adira awa naso yei puma umu indare. ³⁸ Edo jiwari mi sira, ‘Embo ave na gebe adira awa umu uriri mata uso jo da vivitise atadira edo umu uso jo da edo jojadira.’” ³⁹ Edo Iesu ge awa sisira awa Asisi Kotopu embo da jo da awa sisira. Edo iji ainde God Asisi Kotopu awa itae ra ainda be awa Iesu betae edo God mi umu jigae erae awarate amboda

embo ave Iesu ge be adira awa Asisi Kotopu awa badira.

⁴⁰ Edo embo jiwae be ge awa ingido edo embo nenei mi sisera, “Embo emone God da binga sari embo ra.”

⁴¹ Edo embo nenei mi sisera, “Umone God mi embo itari bugarase sisira embo awa ra.” Awarate embo nenei mi sisera, “God mi embo itari bugarase sisira embo amone Galilee embo ae ra. ⁴² Edo jiwari mi sira embo God mi itari bugarase sisira embo amone David da orobe ra. Edo uso ai mi umone David atima isira nati Bethlehem aida aida burisira.” ⁴³ Awasedo embo jiwae be Iesu mo averi awa ge da sae edo kotari ewoga kawoga isera. ⁴⁴ Edo embo nenei umo bundari dipapa isera te ungo ungodada ingo mi umo jigari awa sago ae isera.

NICODEMUS IESU EMBO GE EWAMEI SISIRA

⁴⁵ Awasedo isoro embobo engenembedo priest babojegari de Pharisee embobo de da yei mambero ungo mi nganega isera, “Roedo umo budo bugae etevi?”

⁴⁶ Setero isoro embobo mi mina sisera, “Embo emone embo nenei awodo ae ra. Edo embo nenei embo emimi ge sira awodo awa sae edo era.”

⁴⁷ Setero Pharisee embobo mi ungodada yei nganega isera, “Embo amimi ingo gandubetira awase ingo embo awa ge be evi ta rora? ⁴⁸ Edo ingo gitijigari da ta Pharisee embo da ta awa embo awa ge be eoro gido evi ta? ⁴⁹ Edo embobo eiawa ungo Moses da agodari gae awasedo God mi ungo kasadira.”

⁵⁰ Edo Nicodemus awa ungodada teda aindaa atisira. Edo embo re unemi matu Iesu gadi mambusira. ⁵¹ Edo unemi ungodada yei sisira, “Ingodenaso agodari mi sira ingode mana embo kasadera edo bekuba adi ra te giti awa umo ro etiri awa gido awodo adera.”

⁵² Setiri ungo mi sisera, “Imo daedo Galilee busu embo teta Iesu inge ta? Imo mambudo jiwari awa ajigedo gio. Edo ajigedo aindaa God da binga sari embo da ave awa inge Galilee busu embo awa mana gadesa gio.”

8

VIRO EVETU AWA BEKUBA ISERA

¹ Embo berari awa ungodada nati da mambusera te Iesu umo awa Olive doriri da mambusira. ² Edo sipo de umo engenembedo Jew embobo da tumondebain ari oro da mambusira. Edo embo jiwae be umo jiroroka edo anumbetero edo umo ungo atopatadi tuturo isira. ³ Edo agodari da atopapotigari de edo Pharisee embomei de mi evetu da awa viro iri tambudo budo Iesu da yei bugusera. Edo evetu awa budo bugudo setero evetu awa embo berari da diti da dederisira. ⁴ Edo ungo mi Iesu da yei sisera, “Atopatari evetu eiawa viro iri tambera. ⁵ Edo Moses mi nangoda agodari jivedo sisira evetu ave viro adira awa ungo mi ganuma mi evetu awa doro betarase sisira. Edo ge eiawa imo rawodo kotesi?” ⁶ Edo ungo awa sisera awa ungo Iesu ungodada ge mi wao edo bekuba adi sedo sisera.

Awarate Iesu kukubedo uso ingo soro mi busu da kakari isira. ⁷ Edo umo kakari edo atae

edo sekago erido ungoda yei sisira embo ave umo wasiri biae ae gido embo awa evetu ounda yei ganuma giti pigare.”⁸ Sedo umo sekago kukubedo busu da kakari isira.

⁹ Edo embobo ge awa ingido embo ogo da tuturo edo sasainbedo da mamba egisera. Edo ungo berari atae mambero evetu awa ainda derido atisira Iesu de daedo. ¹⁰ Edo Iesu sekago erido evetu ainda yei sisira, “Evetu embo berari rawari? Ungo berari imo bekuba ari sago ae etera edo ungo imo dodo mamberi ta?”

¹¹ Setiri evetu mi mina sisira, “Gebe ungo berari da doae na dodo mambere.”

Edo evetu awa setiri Iesu mi sisira, “Na daedo mana imo bekuba adena. Mambuio edo sekago wasiri biae eose.”

IESU AWA BUSU BERARI DA EMBORO DA USASA

¹² Iesu sekago embo da yei ge sise sisira, “Na awa busu berari da embo da usasa ra. Embo ave na ambo ambo adira awa mana umenga da pepeta adira te usasa mi uso emboro awa jatebadira.”

¹³ Edo umo awodo setiri Pharisee embobo mi uso yei sisera, “Imo imosuka imo averi awa sesa te imone ge busesa.”

¹⁴ Setero Iesu mi sisira, “Na ge busae ra. Edo na ge ro sena awa na nasuka awa sena te na ro sena amone ge be sena ainda be awa na yei rawainda edo bugusena awa na gari edo na yei rawainda mambutena awa na gari rate ingo na yei rawainda edo bugusena edo yei rawainda mambutena awa ingo gaera. ¹⁵ Edo ingo na

ingoda kotari mi kasewa te na boroko mana ingo kasadena. ¹⁶ Awarate na boroko ingo kasadena awa nasu kasari awa ge be ae etira ainda be awa na nasuka kasae ra te nasu Mama na itiri bugusena embo amimi nangae atise na kondade ira. ¹⁷ Edo ingoda agodari mi sira embo etoto ge ro setera awa dada edo awara setera awa ungo ro sera awa ge be ra. ¹⁸ Edo na embo averi awa be isaga ena edo Mama na itiri bugusena awa daedo na averi awa be isaga ira.”

¹⁹ Edo umo awodo setiri ungo mi umo nganega isira, “Iso imamo mo rawari?”

Setero Iesu mi mina sisira, “Ingo na gae edo ingo nasu Mama gae. Awarate ingo na gadewa awa ingo nasu Mama daedo gadewa.”

²⁰ Edo Iesu umo Jew embobo da tumondebain ari oro da gano itari tewo da demo da derido atopapotise ge emone sisira. Awarate uso betari iji awa bugae gido ungo mi umo bunda doturiserera.

JEW EMBOBO DA GITIJJIGEGARI IESU DA GEGARI SAGO AE ISERA

²¹ Edo Iesu sekago ungo da yei sisira, “Na mambutena edo ingo mi na eura adewa te na tambae edo wasiri bebegae ise atima betadewa. Edo ingo mana yei na mambutena ainda mana mambadewa.

²² Setiri Jew embobo da gitijjigegari mi sisira, “Umo sira ingo mana yei na mambutena ainda mambadewa sira. Edo umo mo ge mo rora sira? Umo umosuka dedo betadi sita?”

²³ Edo ungo awa setero Iesu mi mina sisira, “Ingo awa yei tuda ainda embobo ra te na awa

yei inda ainda embo ra. Edo ingo awa busu einda embobo ra. Na awa busu einda embo aera. ²⁴Awasedo na ingoda yei setena ingo wasiri bebegae ise atima bebetegawase setena. Edo ingo ge be ae adewa awa na awa embo sena awa namona edo ingoda wasiri bebegae awa ingode daedo atirari ingo betadewa.”

²⁵ Edo Iesu awodo setiri ungo mi umo nganega isera, “Imo mo averi?”

Setero Iesu mi mina sisira, “Tuturo da edo bugudo boroko na averi awa seono gosewowa awara. ²⁶ Edo ingo wasiri bebegae jiwae ewowa edo nanemi ingo kasari katogo ra edo ingo rora jiwae be atopatano gae etewa te na mana adena ainda be awa embo amemi na itiri bugusena awa ge be edo unemi ro sanase sira na awa sena. Na ge nenei mana sadena.”

²⁷ Edo ungo Iesu Mamo da jawo da ge sira awa gae. ²⁸ Awasedo Iesu mi ungodu yei sisira, “Amboda ingo na God da mei embo isena awa jigawo erari iji ainde ingo na embo sisena embo awa na awa gadewa. Edo iji ainde daedo ingo mi gadewa na naso kotari mi ge sae rate ro Mama mi na atopapotisira awawa na sisena. ²⁹ Edo na itiri bugusena embo awa nangae daedo atima ira ainda be awa na iji berari eono umo dubo ewamei edo ira awasedo.”

³⁰ Edo embo jiwae be Iesu rovi ravi eiawa siri ingisera awa ge be isera.

IESU BINEI DA KINAPEINA DE GOD DA KINAPEINA DE DA GE SISIRA

³¹ Awasedo Iesu mi Jew embobo umo ge be isera ainda yei sisira, “Ingo naso atopatari kera

adewa awa ingo awa naso ambojimbibe adewa.
³² Edo ingo ge be awa gadewa edo ge be mi ingo wujegadira.

³³ Edo Iesu umo awodo setiri ungo mi mina sisera, “Nango awa Abraham da orobe ra. Edo nango awa embo nenei da agipo aera. Edo inemi setesa ge be mi ingo wujegadira ge ainda be mo rori?”

³⁴ Edo ungo awodo setero Iesu mi ungodaye sisira, “Na ingoda yei ge be sena embo ave wasiri biae adira embo amone wasiri biae da agipo embo ra. ³⁵ Edo agipo embo awa mana mamoda mando da matawa atadira te mei mi uso mamoda mando da matawa atadira. ³⁶ Edo na God da mei mi ingo wujegadena awa ingo nei ro mi jigadi ae tepo mata awodo atadewa. ³⁷ Edo na ingo Abraham da orobe awa gosena te ingo na dawo betanase jarewa ainda be awa ingo naso atopatari awa bari ujo ae ise gido. ³⁸ Edo na ro naso Mama mi naso yei etiri gosisena awa ingoda yei sedo ena te ingo ingoda imamo mi ro setiri gosisewa awa edo ewa.”

³⁹ Edo Iesu umo awodo setiri ungomiso yei mina sisera, “Nangoda mama ne Abraham na.”

Setero Iesu mi mina sisira, “Ingo Abraham da kinapeina be re buro umoro isira awa ae etewa. ⁴⁰ Edo na ge be God mi na atopapotisira awa sedo ena edo na ingo ge busari awa atopatae rate ingo na dawo betanase jarewa. Abraham wasiri biae da buro eiedo awa aera. ⁴¹ Ingo awa teta ingoda imamo mane mi edo ira da awodo awa ewa.”

Edo umo awodo setiri ungo mi mina sisera, “Nango awa God da kinapeina be ra.”

⁴² Setero Iesu mi ungodada yei sisira, “God awa ingoda imamo be gido re ingo na dubo beowa ainda be awa na God da yei dodo ainda bugudo edo boroko ainda atena. Na nasuka bugadi kotedo bugae rate God mi itiri na bugusena. ⁴³ Edo ro edo ingo na ro sena awa gae jarevi? Ingo gadi jarewa ainda be awa ingo gari ujo ae ewa awasedo. ⁴⁴ Edo ingo awa ingoda imamo binei da kinapeina edo ingo unemi ro awase dipapa ira awa adi dipapa ewa. Tuturo da edo bugudo boroko da awa umo awa embo dari betari embo ra. Edo umo iji berari ge busedo ira ainda be awa uso jo da awa ge be awa atae awasedo. Ge bubusegari mi uso jo awa ato ae edo atira awasedo umo iji berari ge busedo ira. Edo unemi iji berari ge busedo ira ainda be awa umo awa ge busari berari da mammo awasedo.

⁴⁵ Awarate na iji berari ingoda yei ge be sedo ena te ingo na ge be ari dipapa ae edo ewa. ⁴⁶ Ingoda teda ainda embo da mi na wasiri biaie ari seita? Sari katogo aera. Na ingoda yei ge be sena ro edo ingo na ge be ae edo evi? ⁴⁷ Embo ave uso Mammo awa God re iaviri de God da ge ingido ira. Edo ingo awa God da kinapeina ae gido ingo uso ge ingae edo ewa.”

⁴⁸ Edo umo awodo setiri Jew embobo mi Iesu da yei mina sisera, “Imo awa Samaria busu embo ra aumo na. Edo asisi biaie iso jo da atima ira.”

⁴⁹ Edo ungo awodo setero Iesu mi ungodada yei mina sisira, “Asisi biaie naso jo da atae ra. Na naso Mama sapo edo ena te ingo na sapo ae edo ewa. ⁵⁰ Na embo mi na sapo orase eura aerate God mi ari embo mi na sapo adera edo unemi embo na

ujo ae adira awa kasadira. ⁵¹ Edo na ingoda yei ge be sena embo ave naso binga awa kera adira awa mana yei riawo matawa euse atima ira ainda mana mambadira.”

⁵² Edo umo awodo setiri Jew embobo amimi uso yei sisera “Imo ro setesa awa ingido nango boroko getera asisi biae iso jo da atima ira. Abraham bebetisira edo God da binga sari embobo bebetegurisera te imo sesa embo ave naso binga awa kera adira awa mana betadira sesa.

⁵³ Nangoda mama Abraham bebetisira. Edo imo mana nangoda mama Abraham derigadesa. Edo God da binga sari embobo berari bebetegurisera. Edo imo kotesa God da binga sari embobo awa inemi deriguresa? Imo ro edo jariga eiedo esi?”

⁵⁴ Edo ungo awodo setero, Iesu mi mina sisira, “Na nasuka jariga adena awa naso ge awa tepo ra. Awarate naso Mama ingo mi ingoda God sedo ewa embo amimi na jasiga ira. ⁵⁵ Edo ingo God gae ra te na umo garira. Edo na umo gae sadena awa na ge busadena teta ingo mi ge busewa da awodo. Awarate na umo gari ra edo na uso ge kera edo ena. ⁵⁶ Edo ingoda imamo Abraham awa naso bugari iji awa gido iaviri isira. Edo na bugadena awa gido jo iaviri isira.”

⁵⁷ Edo umo awodo setiri Jew embobo mi uso yei sisera, “Imo iso gaeko awa 50 bae ra edo imo aso nango mi imo ge be orase arago ise imo Abraham gari sesa.”

⁵⁸ Edo ungo awodo setero Iesu mi mina sisira, “Na ingoda yei ge be sena Abraham uso ai mi bae atiri na atima isena.”

⁵⁹ Edo umo awodo setiri ungo mi ganuma budo umo dadi isera te God mi Iesu apuregetiri embo Iesu umo gari sago ae etiri edo embo da teda awodo pepeta edo mambudo Jew embobo da tumondebain ari oro awa doturisira.

9

IESU EMBO DITI GUBA ARI ETIRI EWAMEI ISIRA

¹ Edo Iesu umo pepeta ise embo da awa uso ai mi diti guba ari burisira awa gosisira. ² Edo Iesu da ambojimbini mi uso yei nganega isera, “Atopatari embo amenda wasiri biaie mi etiri embo eiawa diti guba de ai mi burisiri? Uso ai mammo da wasiri biaie mi etiri isita ko uso wasiri biaie mi etiri umo diti guba ari awodo ai da tini da wowosisiri?”

³ Setero Iesu mi mina sisira, “Uso aimamo ga da ta uso wasiri biaie mi ae umo ai mi diti guba ari bara. Uso diti guba awa embo mi God da ari wasiri goroba de mi ari ewamei irirari embo mi gorase sedo uso diti re guba isira. ⁴ Edo iji atira ainde ingode embo amemi na itiri buguseni ainde buro awa ore ko tumba bugutira ainde embo mi mana uso buro awa mana adera. ⁵ Edo na busu da atena awa na awa busu berari da embo da usasara.”

⁶ Edo Iesu awodo sedo busu da kosiwa edo kosiwa isira amimi Iesu busu etiri bebeta isira. ⁷ Edo ingo soro mi busu bebeta isira awa embo ainde diti da detiri bebeta etiri uso yei sisira, “Mambuio umo diuga jawo Siloam ainde iso dombu segase.” Edo jawo Siloam ainde be awa unemi umo itiri mambusira. Edo embo awa

ainda mambudo uso dombu segisira. Edo engenemburise umu sekago yei isaga gosisira.

⁸ Edo uso otatao de embo ungu matu umu benunu siri gosisera amimi nganega isera, “Embo omomo anumbedo atise benunu sedo ira awa ta?”

⁹ Edo ungu awa setero embo nenei mi sisera, “Gebe embo re awara.”

Awarate embo nenei mi sisera, “Awodo aera embo amone awa aera awarate umone embo awa inge ira.”

Edo ungu awa setero embo amimi mina sisira, “Namone embo awa ra.”

¹⁰ Edo umu awa setiri ungu mi umu nganega isera, “Rawodo edo iso diti pirigetiri imo yei sekago gosesi?”

¹¹ Setero embo amimi mina sisira, “Embo jawo Iesu mi busu davedo naso dombu da gajedo naso yei siutara, ‘Siloam da mambudo iso dombu segeio.’ Awasedo ainda mambudo naso dombu segutana. Edo segedo awa na sekago yei gosena.”

¹² Edo embo awa awa setiri ungomi umu nganega isera, “Embo amomo boroko rawari?”

Setero mina sisira, “Na gaera.”

PHARISEE EMBOBO EMBO DITI GUBA ARI AWA NGANEGA ISERA

¹³ Ungu mi embo matu dombu guba ari atinatina awa budo Pharisee embobo da yei mambusera.

¹⁴ Edo Iesu embo busu davedo etiri embo dombu ewamei isira amone Jew embomei da tumondebain ari iji de isira. ¹⁵ Edo Pharisee embobo mi embo awa nganega isera rawodo edo uso diti pirigetiri umu yei sekago gosiri awa nganega isera. Edo embo amimi ungodu yei

sisira, “Unemi naso dombu da busu itiri edo na naso dombu segedo edo na sekago yei gosena.”

¹⁶ Edo umo awa setiri Pharisee embo nenei mi sisera, “Embo amemi eiedo iutari amone God da embo aera ainda be awa umo ingodenaso tumondebain ari iji da agodari awa kera ae edo ira.”

Awarate embo nenei mi sisera, “Umo embo biae re wasiri awodo re mana ae etira.” Edo ungo awodo setero edo Pharisee embobo ungodage da awara ae edo kausu kausu isera.

¹⁷ Awasedo Pharisee embobo mi sekago embo awa nganega isera, “Embo eiawa iso diti etiri pirigetiri imo yei gosesa mo imo embo amo ave sesi?”

Setero mina sisira, “Umone binga sari embo God mi itiri bugutara.”

¹⁸ Awarate Jew embobo da gitijijegari awa umo ai da tini da edo diti guba ari wosedo edo boroko yei gari awa ungo gebe ae edo setero uso ai mamoga bugusera. ¹⁹ Edo ungo bugero nganega isera, “Mei emomo ingoda ta? Edo umo diti guba ari tini da edo wowosisita? Edo rawodo edo umoboroko yei gosira amomo ge be ta?”

²⁰ Setero uso ai mamoga mi mina sisera, “Nango umo nangoda mei awa gosera edo umo tini da edo diti guba ari bugusira awa gosera.

²¹ Awarate nango umorawodo edo boroko yei gosiri edo uso dombu amemi etiri pirigetiri awa nango gaera. Umone embo ra. Uso yei nganega edo gi gave. Umo umosuka ingoda ge mina awa sadira.” ²² Edo uso ai mamoga eiedo sisera ainda be awa ungo Jew embobo da gitijijegari awa oju

isera. Edo Jew embobo da gitijijegari mi matu sisera, “Embobo amemi Iesu awa God mi soREGARI embo itari bugarase sisira awa itari bugari ge sadera awa nango mi embo awa warawara oro Jew embobo da dada ari oro dodo mambadira.”

²³ Awasedo uso ai mamO ga mi sisera, “Umone embo ra. Nganega edo gi gave.”

²⁴ Edo uso ai mamO ga awodo setero, Pharisee embobo mi setero embo diti guba ari ai da tini da edo wowosisira awa totorisira. Edo umo toriri uso yei sisera, “God da dombu da gebe seio. Nango embo amone wasiri biae embo awa gari ra.”

²⁵ Edo ungo awa setero embo amimi mina sisira, “Embo awa wasiri biae embo ta wasiri ewamei embo ta awa na gaera. Edo rora da na gosena awa eire matu awa na diti guba ari edo yei gadi jarima isena te boroko na yei gosena.”

²⁶ Edo embo awa awodo setiri ungo mi nganega isera, “Iso yei ro iutari? Rawodo edo iso dombu etiri pirigurari?”

²⁷ Setero mina sisira, “Na matu ingoda yei siutana te ingo naso ge ingari ujo ae ititawa. Edo ro edo nanemi sekago sano gadi dipapa evi? Awase ingo uso ambojimbi ari dipapa evi ta rora?”

²⁸ Edo umo awodo setiri ungo mi umo isibedo uso yei sisera, “Imone embo ainda ambojimbi ra. Nango re Moses da ambojimbi ra. ²⁹ Edo nango gosera God Moses da yei ge sisira awarate embo nei eiawa umo rawainda edo bugusiri awa nango gaera.”

³⁰ Edo ungo awodo setero embo amimi mina sisira, “Na kove be ena. Ingo umo yei rawainda

edo bugusiri awa ingo gae sewa te umo naso diti etiri pirigetira. ³¹ Edo ingodena gari God embo wasiri bebegae edo era ainda ge ingae edo ira te umo embo umo sapo ise ungo ro orase dipapa ira awa edo era ainda ge ingido ira. ³² Edo rora berari ae atisira ainda edo bugudo boroko da embo da amemi embo ai da tini da edo diti guba bugari awa sekago yei gari awa embo da amemi gae. ³³ Awasedo God mi embo eiawa itae bugae re umo mana ari wasiri eiedo awa mana ae etira.”

³⁴ Edo umo awodo setiri ungo mi mina sisera, “Imo iso inyei mi burisira iji ainda edo bugudo boroko da imo awa wasiri biae embo ra. Edo imo nango atopatadi jaresi ta?” Edo ungo awa sedo embo awa Jew embobo da dada ari oro da awa ondetero dodo mambusira.

DITI GUBA JODA AINDA GE

³⁵ Edo Iesu embo awa ondari ge awa ingido embo awa tambudo sisira, “Imo God da mei embo isena awa ge be esi ta?”

³⁶ Setiri embo amimi mina sisira, “Atopatari embo emomo averi awa se gido na embo awa ge be ane.”

³⁷ Setiri Iesu mi uso yei sisira, “Imo embo amone matu getesa edo iso yei boroko ge sira embo awa ra.”

³⁸ Edo Iesu awodo setiri embo awa Iesu da jo da baingo dederi edo sisira, “Bada na ge be ena.”

³⁹ Edo embo awa awodo setiri Iesu mi sisira, “Na busu da bugusena awa embo da ungodaga gari rawodo ri awa isaga adi. Edo na bugudo ano embo ave ungodaga jo da diti guba ari awa gorase.

Edo embo ave ungo gari kotera awa ungo diti guba ari awodo awa isaga adena.”

⁴⁰ Edo umo awodo setiri Pharisee embo nenei ainda derido uso ge ingise atisera amimi uso yei nganega isera, “Imo nango diti guba ari awa sesi ta?”

⁴¹ Setero Iesu mi mina sisira, “Ingo diti guba ari re ingo wasiri biae ari sae etena te ingo mi sewa nango gosera sewa awasedo ingoda wasiri bebegae awa mata awodo ingoda jo da atadira.”

10

IESU USO EMBO MATA AWODO SIMBA EDO ISIRA

¹ Iesu mi sisira, “Na ingoda yei ge be sena embo ave wo sheep da ara be da awodo toradi ae rate demo da awodo ririkedo vitadira embo amone bengono embo ra. ² Edo wo sheep simba ari embo be re mangiro da awodo torido ira. ³ Edo mangiro pirigari embo mi mangiro pirigedo ira edo wo sheep simba ari embo torido ira. Edo wo sheep ungodu jawo siri ungo mi uso yei bugudo era edo unemi ungo gitijigido budo ponda mambudo ira. ⁴ Edo umo ungo gitijigido ponda bugudo ungodu giti da pepeta edo ira. Edo sheep uso ge javi ingido umo ambo ambo edo era. ⁵ Edo ungo embo da da ge javi ingae edo re ungo mana umo ambo ambo adera ko ungo umo gae awasedo.”

⁶ Edo Iesu inia da kiki eiawa ungodu yei sisira te ungo ro sira ainda be awa gadi jarisera. ⁷ Awasedo Iesu kiki ainda be awa ungodu yei ujugurisira. Edo unemi sisira, “Na ingoda yei ge be sena. Na awa wo sheep da mangiro. ⁸ Edo na

bugae ateno embo nenei bugusera awa bengono embo ra awarate sheep ungod ge ingae isera. ⁹ Na awa mangiro. Embo ave bugudo toradira embo awa God mi soregadira. Edo embo awa torido bugudo ise ewamei ari jiwae be tambadira. ¹⁰ Edo bengono embo awa bengono adi edo dari betorase edo usibesi adi bugudo ira awarate na awa wasiri uso be jiwae be de da awa itadi bugusena.

¹¹ “Na awa wo sheep simba ari embo ewamei. Edo sheep simba ari embo ewamei awa uso wasiri awa uso sheep embo itido betadi sia edo ira. ¹² Awarate buro embo kondade edo ira amone sheep simba ari embo be aera. Edo umo ambe wo buguteuri gido sheep dodo sumbudo mambudo ira. Edo umo sumbudo mamburi ambe wo mi sheep degaburiga eoro dada edo era. ¹³ Edo buro embo kondade edo ira awa sumbudo ira ainda be awa umo gano embo buro ira awasedo ro sheep da yei bugadiri awa umo awa kotaera.

¹⁴⁻¹⁵ “Na awa sheep simba ari embo ewamei na. Edo na sheep naso topo mo rawari awa na gari edo ungo na gari teta naso Mama umo na gari edo na naso Mama gari awodo. Edo na ungo embo betadi sia etena. ¹⁶ Edo sheep naso topo nenei awa puga einda jo da atae ra te ponda atera. Edo nanemi mambudo ungo daedo einda budo bugadena. Edo ungo naso ge ingido edo diti da adera edo na sheep simba ari embo mi ungo simba adena.

¹⁷ “Edo Mama na dubo budo ira ainda be awa na betedo sekago eradi sia ena awasedo. ¹⁸ Edo na awara sae adena awa embo mi mana na doro

betadena. Edo na dipapa adena iji ainde nanemi awara sano embo mi na doro betadena. Edo naso betari de naso erari de awa naso topo ra. God mi na ro adena awa setiri gosisena.”

¹⁹ Edo Iesu awodo setiri Jew embo mi ungo ungosuka kotari neinde kainde edo diti etoto isera. ²⁰ Edo embo jiwae be mi sisera, “Asisi biae mi uso jo da atima ira. Edo umone jiro biae ari embo ra. Roedo uso ge ingise atevi?”

²¹ Awarate ungo awodo sero embo nenei mi sisira, “Embo asisi biae uso jo da atadira amone mana ge embo emimi sira awodo awa mana sadira. Edo asisi biae mi mana embo diti guba ari awa ari mana pirigadira.”

JEW EMBOBO IESU UJO AE ISERA

²² Jew embobo da tumondebain ari oro da ewamei ari iji awa bugiri gido Jew embobo berari awa Jerusalem dada isera bondo sia adi. Edo kariga duberi ainde awa jamo jamo ra. ²³ Edo Iesu awa Jew embobo da tumonde bain ari oro da joda jawo Solomon da yei ainda pepeta isira.

²⁴ Edo umo pepeta iri Jew embobo mi umo jiro-roka edo uso yei sisera, “Ro edo imo averi awa nangoda yei sae esi? Nango iji roinge inemi saso gadi simba eri? Gebe se gore. Imo mo soregari embo God mi itari bugarase sisira awa ta?” [ZL]

²⁵⁻²⁶ Edo ungo awodo setero Iesu mi mina sisira, “Na matu ingoda yei ge sena te ingo na ge be ae edo ewa. Edo na buro edo ena awa naso Mama da goroba mi, iji berari na averi awa isaga edo ira te ingo awa naso sheep ae gido na ge be ae edo ewa. ²⁷ Edo naso sheep naso ge javi ingido

era. Edo na ungo gari edo ungo na ambo ambo edo era. ²⁸ Edo nanemi wasiri mata awa atari itano ungo mata awa atadera. Edo embo mi mana naso ingo da soumbadera. ²⁹ Naso Mama ungo naso yei ititisira awa embo berari de rora berari de awa derigurisira. Edo ungo mi mana Mama da ingo da ungo soumbadera. ³⁰ Namonde Mama de nango etoto awa da ra.”

³¹ Edo Iesu awodo setiri Jew embobo mi ganuma budo pigedo umo dadi isera. ³² Edo Iesu mi ungodu yei sisira, “Rora ewagaewa nanemi anase Mamo mi ititisira awa eteno ingo gosisewa. Naso buro ewamei da rawainda tamo da ingo na ganuma mi dadi evi?”

³³ Edo umo awodo setiri Jew embobo mi mina sisira, “Nango iso buro ewagaewa awasedo imo ganuma mi dadi aera te imo God isiburesa awasedo era. Imo awa embo ra te imo sesa imo awa God.”

³⁴ Edo ungo awodo setero Iesu mi mina sisira, “Ingoda jiwari mi sira God mi embo da yei umo gitijigido ira da awodo gitijigorase goroba ititisira sedo ira. ³⁵⁻³⁶ Edo ro jiwari mi sira amone ge be mata awodo atari ra awasedo jiwari mi God mi goroba ari umo gitijigido ira da awodo embo uso binga burisera, ainda yei gitijigorase goroba ititisira, ro edo ingo na God isibari ge sevi? Edo Mama na naso buro da sia edo busu da itiri bugusena. Edo unemi sisira na awa God da mei. ³⁷ Edo na naso Mama da buro ae adena awa na ge be ae ewo. ³⁸ Awarate na naso Mama da buro awa irinono edo ingo na ge be ae adewa awa buro awa ge be awodo ge be ewo. Awodo ge be ise awa

ingo gadewa Mama awa nangae aturi edo na awa Mama ga atima ena awa gadewa.”

³⁹ Edo Iesu awodo setiri ungomu sekago Iesu sandadi jarisera te umu dodo mambusira.

⁴⁰ Edo Iesu umu Jordan awa sembudo mam-budo yei John umu mi embo ewamei edo isira ainda mambusira. ⁴¹ Edo umu ainda aturi embo jiwae be mi uso yei bugudo isera. Edo sedo isera, “John ari wasiri goroba de ae rate embo einda jawo da ge sedo isira awa ge be ra.” ⁴² Edo embo jiwae be ainda atisera awa ge be isera.

11

LAZARUS BEBETISIRA

¹ Embo da jawo Lazarus awa nati Bethany ainda atintina karu isira. Edo Mary de uso jao Martha de awa daedo nati ainda atima isera.

² Mary emone joino muno de Bada da tei da jojedo edo uso kopiri tu mi gainburisira awa ra. Edo karu embo Lazarus awa uso ru ra.

³ Edo ru aimono etoto mi Iesu da yei binga itero mambusira, “Bada iso otao dubo be budo esa awa karu etira.”

⁴ Edo Iesu binga awa budo sisira, “Karu einda be awa Lazarus da betari ae ra te karu einda be awa embo de evetu de mi God jasiga adera. Edo karu eiawa bugira awa ari awa embo mi God da mei awa jasiga adera.”

⁵ Edo Iesu Martha de uso jao de Lazarus de awa dubo budo isira. ⁶ Edo Iesu Lazarus karu ari binga awa ingisira te umu yei awa doae ainda atisira.

⁷ Edo iji etoto atae etiri Iesu uso ambojimbi da yei sisira, “Ingode engenembedo Judea busu da mambore.”

⁸ Edo umo awodo setiri uso ambojimbi mi mina sisera, “Iji tupo be Jew embobo mi imo ganuma mi doru betasase ititara. Edo imo ro edo ainda sekago mambadi sesi?”

⁹ Setero Iesu mi sisira, “Iji de waiko janiburirari embo ave emboro da pepeta adera awa mana tei dedo edo duradira. ¹⁰ Awarate embo emboro da tumbade pepeta adira awa tei dadira ainda be awa tumba awasedo.”

¹¹ Edo Iesu awa sedo sisira, “Ingodenaso otao Lazarus awa ewo ira te uso yei mambudo nanemi ano umo eradira.”

¹² Setiri uso ambojimbi mi mina sisera, “Bada umo ewo ira re umone ewamei adira.”

¹³ Iesu re Lazarus da betari da ge awa sisira awarate ungo kotisera Iesu Lazarus ewo ira sari ge sisera. ¹⁴⁻¹⁵ Awasedo Iesu mi ungodu yei isaga sisira, “Lazarus awa bebetara te na uso yei mambae iutana awasedo dubo ewamei ena ingo awa embo ainda be awa eiedo ira amimi ari ingo na ge be adewa. Puwo ingode uso yei mambore.”

¹⁶ Thomas uso jawo dirugedo sisera dindiga mi ambojimbi da yei sisira, “Ingode daedo mambudo ungae da betore.”

IESU AWA BETARI EMBO JIGURI ERIDO ERA

¹⁷ Edo ungo Bethany nati da bugero edo nati embobo mi ungodu yei sisera Lazarus matu betetiri goutitara. Edo boroko iji 4 atae etiri Iesu bugira. ¹⁸⁻¹⁹ Edo Bethany nati awa 3 kilometres edo Jerusalem nati aikambu gido Jew embobo

jiwae be sorara da mambusera edo Mary de Martha de kondade adi.

²⁰ Edo Iesu bugutira awa sero Martha ingido mando dodo Iesu tambadi mambusira te Mary mando da atisira. ²¹ Edo Martha mi Iesu da yei sisira, “Bada imo einda bugae etesa awa naso ru awa mana betae etira. ²² Awarate na gosena boroko God mi uso yei ro embo nganega adesa awa iso yei itadira awa gosena.”

²³ Edo Martha awodo setiri, Iesu mi uso yei sisira. “Iso ru awa bebetara edo sekago eradira.”

²⁴ Edo Iesu awodo setiri Martha mi mina sisira, “Na gosena umo bebetara te iji sangove de awa umo sekago eradira.”

²⁵ Edo Martha awodo setiri Iesu mi uso yei sisira, “Na awa sekago erari de edo wasiri de da susu ra. Edo embo ave na ge be adera embo awa betadera te sekago erido wasiri de atadera.

²⁶ Edo embo ave wasiri de atise na ge be adira awa wasiri natopo atari awa badira. Edo imo naso ge awa ge be esi ta?”

²⁷ Edo Iesu awodo setiri Martha mi mina sisira, “Ge be Bada. Na ge be ena imo awa soregari embo God mi itari bugarase sisira awa ra. Na ge be ena imo awa God da mei embo nango simba edo era awa ra.”

IESU JI SISIRA

²⁸ Edo Martha awodo sedo mando da engenem-burisirawa edo uso jao jawo sisira. Edo gae unjugari da uso yei sisira, “Atopatarawa bugudo imo gadi simba ira.” ²⁹ Edo Mary ge awa ingido erido burigi be Iesu tambadi mambusira. ³⁰ Edo Iesu umo nati da enya torae rate Martha umo

rawainda tambusiri ainda atisira. ³¹ Edo Jew embobo Mary uso dubo vevera da kondade ise uso mando da daedo atima isera awa umo burigi be erido mambutiri gido umo ambo ambo isera ko ungo kotisera awa Mary awa uje be da ji sadi mambari ge sedo isera.

³² Edo Mary Iesu atisira yei ainda bugudo umo gido Iesu da dombu da baingo dederi edo sisira, “Bada imo ainda atae etesa awa naso ru awa mana betae etira.”

³³ Edo Mary de Jew embobo Mary ga bugusera awa berari ji sisera. Edo ungo awodo ji sero Iesu ungo gido uso dubo ji mi ganagurisira. ³⁴ Edo umo dubo ji mi ganagetiri ungodada yei nganega isira, “Lazarus, yei rawainda goutitavi?”

Setiri ungo mi mina sisera, “Bada po gase.”

³⁵ Edo ungo awodo setero Iesu ji sisira.

³⁶ Awasedo Jew embobo mi sisera, “Giu Iesu Lazarus be dubo budo ira.”

³⁷ Awarate embo nenei mi sisera, “Umo embo diti guba ari awa euri yei sekago gido era. Ro edo Lazarus da betari awa beigtigae iutari?”

IESU LAZARUS ETIRI ERISISIRA

³⁸ Edo Iesu sekago ji mi dubo ganagetiri gido uje be da mambusira. Edo uje awa meko ra edo be awa ganuma nembodiba mi gajisera. ³⁹ Edo Iesu mi ungodada yei sisira, “Ganuma awa miminegeu mambare.”

Setiri embo bebetisira ainda ru Martha mi sisira, “Bada umo betedo iji 4 atae etira awasedo masa biae mimbadera.”

⁴⁰ Edo Martha awodo setiri Iesu mi uso yei sisira, “Na imo iso yei setena, imo na ge be adesa

awa ari wasiri goroba de gadesa. Edo imo awa ruvegetesi ta?”

⁴¹ Edo Iesu awodo setiri ungo mi ganuma awa miminegetero mambusira. Edo Iesu diti inda edo sisira, “Mama na imo jasiga edo ena ainda be awa imo naso yei dengoro edo esa awasedo. ⁴² Edo na gari imo iji berari naso yei dengoro edo esa te na eiawa sena awa embo berari boroko einda atera amimi inemi na iteso bugusena awa ge be orase sena.”

⁴³ Edo Iesu umo awodo sedo atae edo gogo dimbudo sisira, “Lazarus ponda bugu.” ⁴⁴ Edo umo awodo setiri betari embo awa uso tei de ingo de dombu de awa betari gowari bo mi dogari awodo ponda bugusira.

Edo umo ponda bugiri Iesu mi ungodada yei sisira, “Bo awa wujegedo dowo mambare.”

JEW EMBOBO DA GITIJIJEGARI IESU DADI KIKI DIRISERA

⁴⁵ Edo Jew embobo jiwae Mary esega adi bugusera awa Iesu mi ro isira awa gido umo ge be isera. ⁴⁶ Awarate nenei engenembedo Pharisee embobo da yei membudo Iesu mi ro isira awa setero gosisera.

⁴⁷⁻⁴⁸ Edo Pharisee embobo de priest babojegari de Jew embobo da gitijijegari de dada edo ungo ungosuka sisera, “Ingode ro eri? Embo ari wasiri nembogamo jiwae be ira te ingodenanemi umo wasiri ira eiawa beitungae adera awa embo berari mi umo ge be adera. Edo embo berari mi umo ge be adera awa Rome embobo da gitijijegari mi Rome embobo mi ingodena gitijigido era amimi isoro embobo itoro bugudo ungo mi ingodenaso

tumondebain ari oro awa usibesi edo embo on-dero dada adera.”

⁴⁹⁻⁵⁰ Edo embo ainda teda embo jawo Caiaphas priest bajari nembodiba mi sisira, “Ingo kotari bebegae embobo. Eiawa kotewo, ungo mi ingodenaso embo usibesi adera awa biae awasedo embo da mi embo berari awasedo betadira awa ewamei be ra.”

⁵¹ Edo Caiaphas iji ainde awa priest bajari nembodiba atima isira uso kotari mi ge awa sae ra. Awarate God mi kotari awa uso yei itiri sisira Iesu Jew embobo berari awasedo betadira. ⁵² Daedo ingodena gari Iesu awa God da kinapeina busu berari da sisigaga edo atima era awa ungo mi sekago dada orase betadira.

⁵³ Edo iji ainde edo mambutira awa Jew embobo da gitijijigegari Iesu doro betarase kiki dirisera. ⁵⁴ Awasedo Iesu Judea busu da isaga isaga ise tembae ra te yei awa dodo umo nati yei embo atae ainda demonda mambusira nati jawo Ephraim. Edo umo ainda mambudo ainda ambojimbi de daedo dada atima isira.

⁵⁵ Edo Jew embobo da jarusegari bondo awa aikambu isira edo embo jiwae be ungod a nati dodo Jerusalem nati da vivitiser a. Edo ungo ainda vitido ungo bondo tuturo ae atiri ungo ungod a wasiri bebegae segari da wasiri awa isera. ⁵⁶ Edo ungo Jew embobo da tumondebain ari oro da dada ise ungoi Iesu bugita awa gadi eura isera. Edo nganega mina ara isera, “Ingo ro kotevi? Umo jarusegari bondo da bugeita? ⁵⁷ Edo priest babojegari de Pharisee embobo de mi sisera embo anemi Iesu rawainda atiri awa

gido embo amimi ungo gari gido Iesu sandadi sisera.

12

MARY DA WASIRI EWAMEI

¹ Iji 6 atae ari jarusegari bondo adera ainde Iesu Bethany nati da mabusira. Lazarus embo betetiri Iesu mi etiri eririsira awa nati ainda atima isira. ² Edo ungo indari sagetero Martha mi tendeba da ititisira. Edo Lazarus de Iesu de dada ainda anumbedo indari awa indisera. ³ Edo Mary mi joino muno ewamei de awa budo bugusira edo uso mina awa nembodiba be awa budo bugudo Iesu da tei da jojisira. Edo jojedo uso jopiri tu mi Iesu da tei awa gainburisira. Edo joino ainda muno ewamei amimi mando berari awa beda isira.

⁴⁻⁵ Edo Iesu da ambojimbi da da teda Judas Iscariot embo amboda Iesu indiga adira amimi sisira, “Roedo evetu eiawa joino eiawa ori edo K300 budo edo gano awa embo rora ae embobo da itae dodo etiri?” ⁶ Edo umo rora ae embo awa be kotae edo ira te gano nenei awa unemi dipapa edo ira. Edo umo ambojimbi da gano sapoia awa unemi simba edo isira te gano nenei awa unemi budo isira. Edo umone bengono embo ra.

⁷ Edo umo awodo setiri Iesu mi sisira, “Evetu awa doio. Evetu awa wasiri ewamei etira edo naso betari da gowari awa sia etira. ⁸ Edo iji jiwae be imo embo rora ae embobo awa kondade adesa te na awa ingae iji tupo be atadena.”

JEW EMBOBO DA GITIJIJIGEGARI LAZARUS DORO BETARASE KIKI DIRISERA

⁹ Edo Iesu Bethany nati da bugiri Jew embobo jiwae be binga awa ingido ungo daedo ainda mambusera. Edo ungo Iesu umo umosuka gadi mambae rate Lazarus embo Iesu mi betetiri etiri eririsira ainde daedo gadi mambusera. ¹⁰ Edo Jew embobo jiwae be Jew embobo da gitijigegari awa ambo ambo ae dodo Iesu ge be isera ainda be awa umo Lazarus etiri eririsira awasedo. ¹¹ Awasedo priest babojigari Iesu doro betarase kiki dirisera.

IESU JERUSALEM NATI DA TOTORISIRA

¹² Edo iji nei embo jiwae be jarusegari bondo da bugujegurisera amimi Iesu Jerusalem nati da bugutira ainda binga awa ingisera. ¹³ Awasedo ri papatu budo Iesu tambadi sedo mambusera. Edo ungo Iesu tambadi mambuse ungo mi gogo dimbudo sisera, “Bada Oro. Bada Oro. Bada Oro. Embo bugutira emone God da jawo da bugutira awasedo God mi umo ewamei are. Edo embo emone Jew embobo da gitijigari nembodiba ra God mi umo ewamei are.”

¹⁴ Edo Iesu wo donkey da mei awa tambudo ainda tamo da anumbedo bugutira. Edo umo awodo isira awa ro jiwari mi arase sisira awa isira. ¹⁵ Edo jiwari mi Jerusalem nati awa sise sisira, “Zion nati embobo oju eove. Edo giwo ingoda gitijigari nembodiba awa wo donkey da mei da tamo da anumbedo bugutira.”

¹⁶ Edo iji ainde uso ambojimbi ge ainda be awa gadi jarisera te amboda God Iesu jigiri erido uso gitijigari yei da utu da engenemburisira iji ainde uso ambojimbi ro isira ainda be awa gosisera.

¹⁷ Edo embo Iesu mi Lazarus embo gowari meko da jawo setiri wasiri de sekago bugiri gosisera embobo amimi ro isira ainda binga awa setero yise puse isira. ¹⁸ Awasedo embo jiwae be Iesu mi ari wasiri goroba de isira awa ingido ungo Iesu tambadi sedo bugusera. ¹⁹ Edo Pharisee embobo embo jiwae be awa gido sisera, “Oiwawa giu. Embo ingodena doetera. Edo busu berari da embo berari awa umo ambo ambo era.”

GREECE BUSU EMBO NENEI IESU EURA ISERA

²⁰ Edo Jew embobo Jerusalem nati da ungodu bondo ero Greece busu embo nenei daedo dada isera tumondebain adi. ²¹ Edo ungo mi Philip Galilee busu embo uso nati Bethsaida ainda yei bugudo sisera, “Embo ewamei, Iesu gari dipapa era.”

²² Edo ungo awodo setero Philip mambudo Andrew setiri ungo etoto mi mambudo Iesu da yei sisera. ²³ Edo ungo Iesu da yei setero Iesu mi mina ungodu yei sisira, “Na God da mei bugudo embo isena awa doro betadena. Edo ungo mi na doro betano God mi na jigari erido na naso gitijigari yei utu da ainda engenembadena. Edo rora berari eiawa adira iji awa aikambu etira. ²⁴ Edo na gebe sadena ingo giwo. Na durido betadena teta pisa ve mi busu da durido ira da awodo. Edo na betae atadena awa teta pisa be da umo umosuka awodo awarate na betadena awa naso betari mi ari wasiri mata awa atari awa embo jiwae da yei bugadira. ²⁵ Edo embo ave uso wasiri awa iji berari simba adira embo awa betadira awarate embo ave busu da atise uso wasiri topo awa iji berari kotae adira embo

awa wasiri mata awa atari awa badira. ²⁶ Edo embo ave naso agipo adi dipapa adira embo awa iji berari na ambo ambo are. Edo awodo ise awa na yei rawainda atadena ainda naso agipo embo awa nangae atadira. Edo embo ave na sapo adira awa naso Mama mi embo awa rora jiwae mi ewamei adira.”

IESU USO BETARI DA GE SISIRA

²⁷ Iesu mi sisira, “Naso jo memesi ira na ro seni? Na seni ta Mama memesi iji eiawa doaso naso yei bugure? Awodo aera mana awodo sadena ko na memesi budo betadi bugusena. ²⁸ Eiawa nanemi sadena Mama egae embo mi imo jasiga ore.”

Edo Iesu awodo setiri ge javi utu da ainda sisira, “Matu eteno embo na jasiga era edo nanemi sekago adena.”

²⁹ Edo embo ainda dederigedo atisera amimi ge javi awa ingido sisera, “Nango binga barara da javi ingera.”

Edo ungo awodo setero embo nenei mi sisera, “Asisi ewamei mi uso yei ge setira.”

³⁰ Awarate Iesu mi ungodu yei sisira, “Ge javi eiawa naso yei sae ra te ingoda yei setira. ³¹ God mi busu da gitijigari nembogamo wawara adira iji awa bugira. ³² Edo ungo mi na orega da jigoro erido busu berari da embo awa jumbano naso yei puradera.” ³³ Edo Iesu awodo sisira awa uso betari rawodo betadiri awa sisira.

³⁴ Awarate embo jiwae be mi be pigedo mina sisera, “Nangoda agodari mi seuri gido era soregari embo God mi itari bugarase sisira awa mata awodo atadira. Edo imo ro edo sesi God da

mei embo isira awa ungo mi jigoro erarase sesi? Embo eiawa averi?”

³⁵ Edo ungo awodo setero Iesu mi mina sisira, “Iji tupo usasa awa ingode daedo atadira. Edo doawo umenga mi ingo apuregeure ta usasa atira einde usasa da atiwo. Edo awodo ewo ainda be awa embo ave umenga da pepeta ira awa umo yei rawainda mambutiri awa umo gaera awa sedo.

³⁶ Na awa usasa awa ra awasedo na ingode atena ainde na ge be ewo. Edo na ge be ise pepeta irirowo usasa mi iji berari ingo awa jiroroka are.”

JEW EMBOBO IESU GE BE AE ISERA

³⁷ Edo Iesu awa sedo umo yei da ungo mi umo gari sago ae ainda mambusira. Edo Iesu ari wasiri nembogamo jiwae be eitri embomei amimi gosisera te ungo umo ge be ae isera. ³⁸ Edo ro God da binga sari embo Isaiah mi sisira awa be isira. Edo Isaiah mi sisira,

“God, embo amemi binga nango mi era mo ge be eri? Edo amemi God da ari wasiri goroba de awa gido uso binga ge be eri?”

³⁹ Edo ge nei Isaiah mi sisira amimi kondade ari nango ungo roedo ge be ae iseri awa gadera.

⁴⁰ Edo Isaiah mi sisira,

“Ungo ungodati mi georase God mi ungodati awa apuregetira. Ungo ungodati jiro mi georase God mi ungodati jiro awa gajetira.

Edo God mi sira ‘Ungo mi naso yei wareregadi ae awasedo na mana ungo awa ewamei adena.’”

⁴¹ Isaiah mi eiawa sisira ainda be awa umo God uso gitijigari yei da atima isira ainde Isaiah umo gido umo awa ge sedo isira.

⁴² Edo Jew embobo da babojegari jiwae be Iesu ge be isera te ungo embo nenei da yei sae isera ainda be awa ungo Pharisee embobo mi Jew embobo da dada ari oro da awa wawara oro wowosae isera. ⁴³ Edo ungo embo mi ungod a yei doio sorase dipapa isera te God mi ungo doio sarase awa ungo be kotae isera.

IESU MI GE SISIRA AMIMI EMBO KASADIRA

⁴⁴ Edo Iesu mi embo da yei minonu sisira, “Embo ave na ge be era embo awa God na itiri bugusena awa ge be ira. ⁴⁵ Edo embo ave na embo averi awa gosira embo awa God na itiri bugusena awa gosira. ⁴⁶ Na awa teta usasa awodo busu da wowosisena awasedo embo ave na ge be ira awa umenga da atae ra.

⁴⁷ “Edo embo ave naso binga ingise edo kera ae ira awa embo awa nanemi mana kasadena ainda be awa na busu da embo awa kasadi bugae ra te na ungo soregadi bugusena awasedo. ⁴⁸ Edo embo ave na ujo ae ise naso binga bae ira awa embo awa God mi kasadira. Edo iji amboda ge nanemi sena amimi embo awa kasadira. ⁴⁹ Na naso kotari mi ge sae ra te Mama na itiri bugusena amimi ro sanase sisira awa sena awasedo ge nanemi setena amimi embo kasadira. ⁵⁰ Na gari God da binga mi rawodo edo wasiri mata awa atari badevi awa ujugurira. Edo na God mi ro sanase sisira awa sena.”

13

IESU AMBOJIMBI DA AGIPO EMBO ISIRA

¹⁻² Tumba jijirisira edo ewudo awa Jarusegari Bondo da iji. Edo Iesu uso ambojimbi de

anumbedo edo ungoda indari sangove awa dada indisera. Edo Iesu umo gosisira uso iji umo busu dodo uso Mama da yei da mambari iji awa bugira awa gosisira. Edo Satan matu kotari biae Iesu indiga arase awa Judas Iscariot Simon da mei da jiro da itira. Awarate Iesu uso dubo bari uso ambojimbi da awa mata awodo atira. Uso dubo bari ungoda yei awa atae ae ra.

³ Edo Iesu umo gosisira uso Mamo mi rora berari awa uso yei ititisira awa gosisira. Edo umo gosisira God mi umo busu da itiri bugusira edo umo utu da engenembadira awa gosisira. ⁴⁻⁵ Awasedo Iesu erido uso bo tamo da awa ujagedo uso ipu da digido umo tewo da jojedo uso ambojimbi da tei segadi tuturo isira. Edo Iesu ungoda tei segedo atae edo bo ipu da didigurisira amimi gainburisira. ⁶ Edo Iesu Simon Peter da yei bugiri Simon Peter mi sisira, “Bada imo naso tei segadi esi ta?”

⁷ Edo Peter awodo setiri Iesu mi uso yei sisira, “Na ro ena awa imo boroko gadi jaresa te amboda gadesa.”

⁸ Edo Iesu awodo setiri Peter mi mina sisira, “Awodo aera. Imo mana naso tei segadesa.”

Setiri Iesu mi mina sisira, “Na iso tei segae adena awa imo mana naso ambojimbi adesa.”

⁹ Setiri Peter mi mina sisira, “Awara naso tei segedo edo naso ingo de kopiri de segeio.”

¹⁰ Edo Peter awodo setiri Iesu mi sisira, “Embo da ave umo matu umo kainya edo edo emboro da pepeta adira awa uso tei segadira awa uso tamo berari awa ewamei adira. Edo ingo ambojimbi berari awodo awa ewagaewa ra te ingoda teda

da awa ewamei ae ra. ¹¹ Iesu umo embo amemi umo indiga sadira awa matu gosisira awasedo umo sisira ingoda teda embo da awa ewamei ae ra sisira.”

¹² Edo Iesu ambojimbi da tei segedo atae edo uso bo tamo awa sekago ombudo edo sekago engenembedo uso anumba tendeba giti da ainda mambudo anumburisira. Edo ainda mambudo Iesu ungoda yei sisira, “Na ingoda tei segari da wasiri etena ainda be awa gadi jarewa awa gosena. ¹³ Na awa ingoda atopatari edo gitijigari awasedo ingo na atopatari edo gitijigari sadewa amone awara. ¹⁴ Na awa ingoda atopatari edo gitijigari awarate na ingoda tei segetena teta agipo embo mi ingoda tei segae etira awodo. Edo ingo awa ingosuka tei mina sega ewo. ¹⁵ Edo ingo nanemi ingoda yei ro etena awa gido da awodo ingosuka mina ara ewo. ¹⁶ Edo na ingoda yei ge be sena, agipo embo amimi uso bajari awa derigaera edo binga sari embo mi embo amemi umo setiri mambutira embo awa derigaera. ¹⁷ Edo na ingoda yei matu ujugeteno getewa ro adewa amone awasedo boroko ewo. Edo awodo ise awa dubo ewamei ari nembodiba tambave.

¹⁸ “Edo na eiawa ingo berari ainda yei saera. Edo na ingo dada na ambo ambo awase sisena awa gosena. Edo ro jiwari mi sisira awa be adira. Edo jiwari mi sira, ‘Embo da nangae dada anumbedo edo indari indira embo amimi na indiga sadira.’

¹⁹ “Edo wasiri awa ae atiri na wasiri awa adira awa sena. Awasedo wasiri awa irirari ingo na soregari embo God mi itari bugarase sisira awa gido ge be adewa. ²⁰ Edo na ingoda yei ge be

sena embo ave embo nanemi itano bugadira awa badira awa na badira edo embo ave na badira awa God na itiri bugusena awa badira.”

IESU UMO INDIGA ARI DA GE SISIRA

²¹ Amboda Iesu uso jo memesi etiri isaga sisira, “Na ingoda yei gebe sena embo da ingoda teda amimi na indiga adewa.”

²² Edo Iesu awodo setiri ambojimbi dombu mina gara isera ainda be awa ungo mana mana isera Iesu mo ge mo amende siri awa. ²³ Edo embo da ambojimbi da teda Iesu be dubo budo isira awa Iesu da demo da anumbedo atisira. ²⁴ Awasedo Simon Peter mi umo babakibedo sisira, “Iesu sedo gi umomo ge mo amende siri awa.”

²⁵ Edo Peter awodo setiri ambojimbi da amimi Iesu ga daeneburise Iesu da yei nganega isira, “Bada embo amemi imo mo indiga eiri?”

²⁶ Setiri Iesu mi mina sisira, “Na ambe eiawa su da patido edo embo amenda itadena embo amimi na indiga adira.” Edo Iesu awodo sedo ambe be da awa budo su da patido Simon Iscariot da mei Judas da yei itisira. ²⁷ Edo Judas ambe awa betiri Satan uso jo da totorisira.

Edo Iesu mi Judas da yei sisira, “Imo ro adi esa awa burigi eio.” ²⁸ Edo ambojimbi nenei tendeba be da anumbedo atisera awa Iesu ro edo Judas da yei awodo siri awa ungo gadi jarisera. ²⁹ Edo Judas ambojimbi da ganu dada ari rora awa simba edo isira awasedo ambojimbi nenei kotisera awa Iesu Judas mi mambudo bondo da indari nei barase sari ge sisera. Edo kotari nei ungodu yei bugusira awa awasi umo Judas mi

embo rora ae embobo da yei ganu itarase sari awodo kotisera.

³⁰ Edo Judas ambe awa budo burigi be ponda mambusira. Edo tumba jijirisira.

IESU AGODARI SEKA SISIRA

³¹ Edo Judas mambiri Iesu mi sisira, “God da mei embo isena amimi betedo edo sekago erari iji awa aikambu etira. Edo iji einde God mi uso goroba nembodiba awa isaga adira. ³²Uso goroba de uso usasa de mi na God da mei bugudo embo isena awa jiroroka adira. Edo eiawa berari burigi be adira.

³³ “Naso kinapeina na ingode iji tupo be atadena. Edo ingo na gari dipapa adewa te ro Jew embobo da yei sisena awa boroko ingoda yei sena, ingo mana yei na mambadena ainda mana mambadewa.

³⁴ “Edo boroko na ingoda yei agodari seka ititena amone eire. Dubo mina bara ewo. Na ingo dubo budo ena da awodo dubo mina bara ewo.

³⁵ Edo ingo dubo mina bara adewa awa embo berari mi ingo naso ambojimbi awa gadera.”

IESU PETER RO ADIRA AWA SISIRA

³⁶ Edo Simon Peter mi Iesu da yei nganega isira, “Bada imo yei rawainda mambadi esi?”

Setiri Iesu mi mina sisira, “Boroko ingo mana nangae mambadewa te amboda ingo na ambo ambo adewa.”

³⁷ Edo Iesu awodo setiri Peter mi nganega isira, “Bada ro edo na boroko imo ambo ambo adi aeri? Na imo awa embo betadi sia etena.”

³⁸ Setiri Iesu mi mina sisira, “Imo be na awa embo betadi sia etesi ta? Edo na iso yei gebe sena,

kokoro egoro sae atirari imo na iji tamonde bero adesa.”

14

IESU AWA GOD DA YEI DA MAMBARI DA EMBORO

¹ Iesu mi uso ambojimbi da yei sisira, “Dubo vevera ise atove. Ingo God gebe edo ewa edo da awodo na gebe ewo. ² Naso Mama da nati da awa mando jiwae be atira edo na awa ainda vitido ingo awa embo yei sia adi ena. Edo eiawa ge busari awa na mana ingoda yei sae etena. ³ Edo rora berari ingo embo sia edo na engenembadema. Edo engenembedo nanemi ingo budo mambano edo yei rawainda na atena ainda ingo mata awa atadewa. ⁴ Edo ingo na yei rawainda mambutena awa ingo gari edo ingo rawodo edo ainda mambari ri awa ingo gari.”

⁵ Edo Iesu awodo setiri, Thomas mi uso yei sisira, “Bada nango imo yei rawainda mambutesa awa gae ra. Edo nango rawodo edo emboro mo geri?”

⁶ Setiri Iesu mi sisira, “Na awa Mamo da yei da mambari da emboro ra. Edo na awa embo ge be awa ujugedo ira awa ra. Edo na awa embo wasiri itido ira awa ra. Edo ingo naso yei purae adewa awa ingo mana Mama da yei mambadewa. ⁷ Edo ingo na gadewa da awodo ingo Mama gadewa. Edo boroko tuturo edo ingo umo gosewa edo isaga etira awa ra.”

⁸ Edo Iesu awodo setiri Philip mi uso yei sisira, “Bada awa nangoda yei isaga egae nango re awa simba era.”

⁹ Edo Philip awa setiri Iesu mi mina sisira, “Philip iji ribori be na ingae atewona te imo na awa be gae ra? Embo ave na gosera embo awa Mama gosira. Edo ro edo imo sesi Mama awa nangoda yei isaga egae sesi? ¹⁰ Philip imo na Mama ga edo Mama awa nangae awa gebe esi ta?” Awa sedo Iesu uso ambojimbibi da yei sisira, “Ge nanemi ingoda yei setena awa naso ge aera. Edo Mama awa naso jo da atise edo buro eiawa ira. ¹¹ Na awa Mama ga edo Mama awa nangae awa gebe ewo. Awarate ingo awa gebe gebe ae edo re ari wasiri nembogamo ena awa gosise gebe ewo. ¹² Edo na ingoda yei gebe sena embo ave na gebe adera awa ari wasiri goroba de awa daedo adira. Embo ainda ari wasiri goroba de amimi naso ari wasiri goroba de awa derigadira ko na awa Mama da yei mambadena. ¹³ Edo ro naso jawo da sedo gadewa awa nanemi adena. Edo nanemi awodo irinono embo mi God da goroba nembodiba awa gosise umo jasiga adera. ¹⁴ Edo ro embo naso jawo da sedo gadewa awa nanemi adena.”

IESU ASISI KOTOPU AWA ATOPAPOTISIRA

¹⁵ Iesu mi ambojimbibi da yei sisira, “Ingo na dubo badewa awa naso ge awa kera adewa. ¹⁶ Edo na Mama sedo gano unemi kondade embo nei ingoda yei itadira Asisi Kotopu awa. Edo umo ingode daedo mata awa atadira. ¹⁷ Edo embo nenei busu da atera awa Asisi Kotopu mana badera ainda be awa ungo umo ujo ae era edo mana umo gadera. Awarate ingo umo gari ra, ainda be awa umo ingode daedo atira. Edo ingoda jo da toridoatira.

18 “Ingo awa teta popoiwo awodo mana atadewa te na ingoda yei engenembadena. 19 Edo iji tupo atae ari na busu da embo doadena te na ingode daedo atadena. Na awa mata awa atima ena awasedo ingo daedo mata awa atadewa. 20 Edo Asisi Kotopu wosadira iji ainde ingo na Mama da yei rawodo atima eni edo Mama rawodo naso yei atima iri edo na ingoda yei rawodo atima eni edo ingo rawodo naso yei atima evi awa gadewa.

21 “Embo ave naso ge budo kera edo iri embo awa na dubo budo ira. Edo embo ave na dubo budo ira embo awa naso Mama mi dubo badira. Edo na embo awa dubo burise edo uso yei na nanasuka isaga adena.”

22 Edo Iesu awa setiri Judas, Judas Iscariot aera amimi uso yei sisira, “Bada ro edo imo nangoda yei isaga adesa te busu da embo neeni da adi ae sesi?”

23 Setiri Iesu mi mina sisira, “Embo ave na dubo badira gido awa naso binga kera adira. Edo naso Mama mi umo dubo badira edo naso Mama de namonde uso yei bugudo ungae daedo atadera. 24 Edo embo ave na dubo bae edo ira awa naso ge kera ae edo ira. Edo binga ingewa awa naso binga aera te Mamo na itiri bugusena amimi binga awa itira.

25 “Edo na ingode atise eiawa ingoda yei setena. 26 Edo kondade ari embo Asisi Kotopu Mamo mi itari naso jawo da bugadira amimi rora berari awa ingo atopatadira. Edo unemi ari rora berari nanemi ingo atopapote mo na awa kotadewa.

²⁷ “Na mambae giti da awa nanemi ingo awa jo jamo jamo de atawase ena. Nanemi ingo jo jamo jamo de atawase ena da awodo na jo jamo jamo de atena. Edo busu da embo berari jo jamo jamo mo rawodo awa seni awa ungo gaera. Edo dubo vevera eove. Edo oju eove.

²⁸ “Ingo ingewo na ingoda yei setena, ‘Na mambutena te na ingoda yei engenembadena.’ Edo ingo na dubo badewa re ingo dubo ewamei adewa na Mama da yei mambutena awasedo, ainda be awa naso Mama ga da atadena awa goroba nembodiba de ra. ²⁹ Edo rora berari eiawa ae atirari na boroko ingoda yei sena awa adira. Edo amboda adira ingo na ge be adewa. ³⁰ Iji tupo simba ise awa na ingoda yei ge sadena ainda be awa Satan busu einda gitijigari de uso embobo de awa bugutera awasedo. Awarate umo naso yei ro ari katogo aera. ³¹ Edo God mi ro anase berari sira awa ena edo busu da embo berari mi awa gido awa na Mamo dubo budo ena awa gadera. Pou ingode yei eiawa dore.”

15

IESU UMO AWA WASIRI DA SUSU AWA ATOPA-POTISIRA

¹ Iesu mi sisira, “Na awa teta buro da grape be da vine inge ra. Edo naso Mama awa teta ve gowari edo buro simba ari embo da awodo ra. Edo ingo awa teta vine da papatu inge ra. ² Edo patu da rawa be ae edo ira awa naso Mama mi eregedo ira. Edo papatu berari rawa be edo ira awa unemi kiambu diugeuri edo osiri seka erido edo be jiwae be edo ira. ³ Edo ingo na binga seno

ingewa awa teta patu diugari edo be jiwae adi ira da awodo ra. ⁴ Edo nangae daedo atiwo edo na ingode daedo atane. Edo ungomi patu da diugedo edo umo umosuka doro atadira awa patu awa mana be adira. Awarate patu awa vine susu de dada adira awa be adira. Edo ingo nangae dada atae adewa awa ingo mana be adewa.

⁵ “Na awa vine edo ingo awa papatu. Edo embo ave nangae atadira awa na da awodo embo ainga atadena edo umo be adira. Edo na ingode daedo atise edo ingo kondade ae adena awa ingo mana nei ro awa adewa. ⁶ Edo embo ave nangae daedo atae adira awa umo awa teta patu diugedo warawara edo era da awodo adira. Edo ungo mi patu awa pigoro mambudo garasa ari edo amboda ungo mi dungoro ewadira. ⁷ Edo ingo nangae daedo atirowo edo naso ge ingoda jo da atadira awa ingo ro embo naso yei sedo gadewa awa nanemi ingoda yei itadena. ⁸ Edo embo ave naso ambojimbi be awa be jiwae adira. Edo ingo be awodo ise amimi awo embo God jasiga adera.

⁹ “Edo Mama na dubo budo ira da awodo na ingo dubo budo ena edo naso dubo bari da mata awodo atadewa. ¹⁰ Na naso Mama da ge awa kera edo uso dubo bari da atima ena da awodo ingo naso ge kera adewa awa naso dubo bari da atadewa.

¹¹ “Na ingoda yei eiawa sena awa naso iaviri ari awa ingode daedo atare edo ingoda jo awa iaviri mi beda are. ¹² Eiawa naso agodari seka na iji berari ingo dubo budo ena da awodo ingo dubo mina bara ewo. ¹³ Edo embo da uso otatao dubo be budo edo ungo awa embo betadira awa

embo ainda dubo bari mi embo nenei da dubo bari awa derigadira. ¹⁴ Edo ingo na ro awase sena awa adewa awa ingo awa naso otatao. ¹⁵ Edo iji boroko einde na ingo agipo embobo sewona awa doturena ainda be awa agipo embo awa uso bajari ro ira awa umo gaera. Awa dodo awa na ingo awa otatao sena ainda be awa rora berari ro naso Mama mi na setiri gosisena awa ingoda yei setena. ¹⁶ Ingo mi na buro eiawa anase jawo sae ra te nanemi ingo buro eiawa awase jawo setena. Edo na ingo jawo sedo setena buro awa ewo be jiwae be are edo be nanjigo atae ari katogo ae awa. Edo ingo buro awa ise ro naso jawo da God mi ingo awa embo arase sedo gadewa awa unemi adira. ¹⁷ Edo eiawa na ingoda yei agodari ititena dubo mina bara ewo.”

BUSU DA EMBO MI GOD DA EMBO UJO AE ADERA

¹⁸ Iesu mi sisira, “Busu da embo mi ingo ujo ae adera edo iji ainde kotewo busu da embo mi na giti ujo ae isera. ¹⁹ Edo ingo mambudo busu da embo de dada adewa awa ungo ingo mana ujo ae adera te teta otao awodo adera. Awarate nanemi ingo jawo setena edo ingo busu da embo de dada ae etewa awasedo ungo mi ingo ujo ae adera. ²⁰ Edo na ingoda yei ro sisena awa kotewo agipo embo mi uso bajari awa derigaera awasedo busu da embo mi na ujo ae edo ungo mi ingo daedo ujo ae adera. Ungo naso ge kera ae etera awa ungo ingoda ge daedo kera ae etera. ²¹ Edo busu da embo mi ingo naso topo awasedo ujo ae adera. Edo ungo mi ingo ujo ae adera ainda be awa ungo na gae awasedo. ²² Edo na ungodu yei

bugae edo na ungoda yei ge sae re ungo wasiri bebegae embobo awa gae etera te boroko ungo rawodo edo ungoda wasiri bebegae apuregeri? ²³ Edo embo ave na ujo ae ira awa naso Mama daedo ujo ae ira. ²⁴ Edo na ari wasiri goroba de jiwae ungoda jo da ewona edo ari wasiri goroba de embo nenei mi ae awa ewona. Edo na ari wasiri goroba de eiawa ungoda jo da ae doae etena awa ungo wasiri bebegae embo awa mana gae etera. Edo ungo naso ari wasiri goroba de awa gosisera te ungo namonde naso Mama de awa ujo ae edo era. ²⁵ Edo ungo na awodo ujo ae edo era awa ungodagadari mi ro sisira awa be etira. Edo ungodagadari mi sira, ‘Ro mi ae rate ungo na ujo ae edo era.’

²⁶ “Edo kondade ari embo mi euri God awa gebe edo ira embo awa bugadira. Nanemi umo itano umo Mama dodo ingoda yei bugudo naso jawo da ge sadira. ²⁷ Edo ingo daedo naso jawo da ge sadewa ainda be awa tuturo da edo bugudo boroko awa ingo na ambo ambo ewowa.

16

EMBO MI AMBOJIMBI UJO AE ADERA

¹ “Gaegae edo ingoda ge be ari naso yei awa atae eurase gido na ingoda yei ro adiri awa sena. ² Ungo mi ingo awa Jew embobo da dada ari oro da warawara oro ponda wosadewa. Edo iji bugadira iji ainde embo amemi ingo doro betadewa embo awa kotadira awa umo God kera ari awa kotadira. ³ Ungo Mamo gae edo ungo na gae awasedo ungo mi eiawa ingoda yei adera. ⁴ Awarate ungo mi ingoda yei eiedo ari iji awa

bugadira ainde nanemi eiawa adira awa sisena awa kotadewa awasedo boroko ingoda yei sena. Edo na naso atopatari buro ingoda teda tuturo isena awa naso iji awa ribori awasedo na matu ingoda yei eiawa sae doturisenana.

ASISI KOTOPU DA BURU

⁵ “Boroko awa na embo amemi itiri bugusena ainda yei vitari aikambu etena te ingoda teda da amemi na imo nonda mambutesi nganega ae.

⁶ Awarate na ingo doturena awa seteno getewa edo dubo vevera mi naso jo beda etira. ⁷ Na

ingoda yei ge be sena na ingo doadena awa ewamei na ainda be awa na inda vitae adena awa Kondade Ari Embo awa ingoda yei bugadi aera.

Awarate na vitadena ainde umo ingoda yei itano bugadira. ⁸ Edo Asisi Kotopu mi bugudo unemi

embo da yei ungo da ari bebegae da kotari edo ari ewagaewa da kotari edo Mamo da kasari da kotari kotera awa bebegae awa isaga adira. ⁹ Edo

ungo ari bebegae kotera awa biae ra ainda be awa ungo na gebe ae edo era awasedo. ¹⁰ Edo ungo

ari ewagaewa kotera awa daedo biae ra ainda be awa na Mama da yei mambadena edo ingo na sekago gadi aera. ¹¹ Edo ungo Mamo da kasari

kotera awa biae ra ainda be awa Mamo busu einda gitijigari awawa matu kasisira.

¹² “Naso ge jiwae be nenei ingoda yei sadena awa atira te ingo boroko ge awa kotari katogo ae ra. ¹³ Edo asisi ge be sedo ira awa bugudo

unemi ge be awa ingoda yei isaga ari gadewa. Umo umosuka ainda ge awa sadi ae ra te ro namonde Mama de mi sadera awa sadira. Edo

unemi wasiri ro amboda adiri awa ingoda yei

sadira. ¹⁴ Edo Asisi Kotopu nanemi ro sadena awa ingido ingoda yei sadir amimi ari embo na jasiga adera. ¹⁵ Edo Mama da gari berari awa naso ra awasedo na setena na ro sadena awa ingoda yei sadira setena.”

DUBO VEVERA DE DUBO EWAMEI DE

¹⁶ Iesu mi sisira, “Iji tupo atae ari ingo mana na gadewa te iji tupo ainda amboda ingo na sekago gadewa.”

¹⁷ Edo Iesu awodo setiri uso ambojimbi mi mina sara isera, “Uso ge einda be mo ro ri? Umo ingodenaso yei sira, ‘Iji tupo atae ari ingo na mana gadewa te iji tupo ainda amboda awa ingo na gadewa.’ Edo uso ge Mamo da yei da mambari ainda be mo ro ri? ¹⁸ Edo iji tupo atae ari ge ainda be mo rori? Nango umo ge ro sira awa gaera.”

¹⁹ Edo Iesu umo ungo mi uso yei ro nganega edo gadi era awa gido ungodu yei sisira, “Na ingoda yei setena iji tupo atae ari ingo mana na gadewa awarate iji tupo ainda amboda ingo na gadewa setena. Edo ingo ingosuka ge einda be mo rori awa sevita? ²⁰ Na ingoda yei ge be sena na memesi nembodiba tambutinono ingo ji biae be sadewa te busu da embobo awa dubo ewamei adera. Edo ingo dubo vevera tambadewa te ingoda dubo vevera awa atae ari dubo ewamei mi bugadira. ²¹ Edo evetu mei badi edo ira ainde umo dubo vevera edo ira ainda be awa uso memesi bari iji awa bugira awasedo awarate umo mei budo ira awa umo uso memesi awa ruvegedo edo dubo ewamei edo ira ko umo mei betira wasedo. ²² Da awodo ingo boroko dubo vevera ewa awarate na ingo sekago gadena iji

ainde awa dubo ewamei nembodiba be embo mi ingoda yei soumbari katogo ae amimi ingoda jo awa beda adira.

²³ “Edo iji awa bugari ingo mana naso yei ro embo sadewa. Na ingoda yei ge be sena ro naso jawo da Mamo da yei ingo embo arase sadewa awa unemi adira. ²⁴ Edo bugudo boroko iji einde ingo ro embo naso jawo da sedo gae ra. God da sedo gadewa awa ro embo uso yei sedo gadewa awa badewa. Awodo irirowo dubo ewamei mi ingoda jo awa beda adira.”

IESU INIA DA GE DE GE ISAGA DE DA GE SISIRA

²⁵ Iesu mi sisira, “Na inia ge mi ingo atopapotemona te iji bugutira ainde inia ge sewona awa dodo na Mamo da jawo da ge isaga ingoda yei sadena. ²⁶ Edo iji awa bugari na mana God da yei ingo ro dipapa ewa awa mana sano itadira te ingo ingosuka naso jawo da ingo ro dipapa ewa awa God da yei sadewa ainda be awa Mamo umo umosuka ingo dubo burira awasedo. ²⁷ Edo Mamo ingo dubo burira ainda be awa ingo na dubo burewa edo Mamo mi na itari bugusena awa ge be ewa awasedo. ²⁸ Edo Mama mi na itiri na busu da bugusena te boroko na busu dodo Mama da yei engenemburena.”

²⁹ Edo Iesu awodo setiri uso ambojimbimi mi uso yei sisera, “Imo boroko inia ge mi ge sae rate imo ge isaga sesa. ³⁰ Nango gido era imo imosuka rora berari awa gido inono ari awasedo imo embo da yei nganega ari ae edo esa. Eiawa sedo nango ge be era God mi imo itiri bugusesa.”

³¹ Edo ungo awodo setero Iesu mi mina sisira, “Ingo eiawa ge be evi ta? ³² Edo iji aikambu bugira edo iji einde ingo berari ingoda nati da sumbudo mambuse na nasuka doadewa. Awarate na nasuka aera Mama awa nangae atira.

³³ “Edo ingoda yei eiawa seteno getewa awa jo jamo jamo de atawase setena. Edo busu einda dubo vevera de memesi jiwae be de bugadira te goroba ewo ainda be awa nanemi rora berari busu da eiawa jarugetena awasedo.”

17

IESU AMBOJIMBI DA JAWO DA GOD MANUNUGURISIRA

¹ Edo Iesu eiawa sedo atae edo diti utu da edo sisira, “Mama naso iji bugira. Edo na iso mei awa jasiga egae edo nanemi imo jasiga ane. ² Edo inemi naso yei goroba ari iteso edo nanemi embo berari gitijigadena. Embo ave inemi naso yei itesa embobo ainda nanemi wasiri matawa atari itena. ³ Edo embo imo awa God da daima ge be awa gido edo na Iesu Keriso embo inemi iteso bugusena awa gae etera amone wasiri matawa atari bari da be re awara. ⁴ Edo na busu da bugudo edo iso goroba awa busu da embo berari da isaga etena. Edo buro ro anase ititisesa amone atae etena. ⁵ Mama ingae rora berari ae atise giti da ingae utu da usasa da dada atisena. Edo boroko usasa awa sekago naso yei itigae.

⁶ “Edo embo busu da embo berari da teda jawo sedo naso yei ititisesa ainda yei imo awa isaga iutana. Edo ungo awa iso topo awarate inemi ungo awa naso yei iteso edo ungo iso ge kera

etera. ⁷ Edo boroko ungo gosera rora berari naso yei bugudo ira awa inemi itido esa. ⁸ Edo binga inemi naso yei ititesa awa nanemi ungodu yei itena. Edo nanemi iteno edo ungo mi betera. Edo ungo gosera awa ge be. Edo na iso yei dodo bugusena. Edo ungo na inemi iteso bugusena awa gebe edo era.

⁹ “Edo na ungo awasedo ge sena. Na iso yei ge busu da embo berari awasedo sae ra te na embo inemi naso yei ititisesa awasedo sena. ¹⁰ Edo ungo berari awa iso topo ra ainda be awa ungo naso topo ra. Edo ungo berari dada rora berari iso nenei ainde awa inemi sekago naso yei da itesa awasedo embo mi na jasiga era. ¹¹ Edo boroko na iso yei da bugutena. Edo na busu da atadi aerate ungo awa busu da atadera. Mama Kotopu iso jawo da goroba mi sedo gosena embomei inemi naso yei ititisesa eiawa simba egae aso ungo diti da edo atore teta imo de namo da atima era da awodo. ¹² Edo na ungodu atisena ainde na iso jawo da goroba mi ungo naso yei ititisesa awa simba ewona. Edo nanemi ungo simba eono edo ungo ewamei da atewora. Edo embo da teda embo ungo gosisera Iesu indiga sadira teta jiwari mi sira awodo umo awa munene getira te nenei da ave munenegae ra.

¹³ “Edo boroko na iso yei bugutena. Edo na busu da atena einde rora eiawa sena amimi naso iaviri ari mi naso ambojimbi da jo awa beda arase. ¹⁴ Edo nanemi iso binga awa ungodu yei itena edo busu da embobo da teda ae awasedo teta na awa busu da embobo da embo nei ae awodo. ¹⁵ Na ungo busu da embo da teda awa

dodo basase sedo gae rate na iso yei sedo gosena ungo soregegae. ¹⁶ Edo na awa busu da embobo da embo nei ae da awodo ungo awa busu da embobo da embo nei ae ra. ¹⁷ Edo iso ge moka awa ungo atopatigae edo ungo ingoda embomei be ore. ¹⁸ Edo inemi na busu da embo da teda atanase iteso bugusena da awodo nanemi ungo awa busu da embo da teda atorase itena. ¹⁹ Edo na ungo awasedo na nasuka iso yei itena edo ungo daedo ungo ungosuka iso yei itorase sedo.

²⁰ “Edo na iso yei ge sena awa ambojimbi eiawa sedo edo daedo ungo amemi ungodada binga ingido na ge be adera awasedo sena. ²¹ Edo na iso yei sedo gosena ungo aso diti da edo dada bundedo atorase. Mama imo awa iji berari nangae atima esa na da awodo ingae daedo dada atima ena da awodo egae ingae na etoto da daedo dada iji berari atore. Edo ungo awodo iriroro busu da embobo mi gosise inemi na iteso bugusena awa ge be ore. ²² Edo imo de namo de awa jo da ra. Edo goroba inemi naso yei ititisesa awa nanemi ungodada yei ititena edo ano ungo daedo jo da orase sedo. ²³ Edo na ungodada atena da awodo imo nangae daedo atesa amimi ungo ungodada jo awa dada edo diti da ore. Edo ungo awodo iriroro busu da embobo mi inemi na iteso bugusena awa gore. Edo ungo daedo gadera imo na dubo budo esa da awodo imo ungo dubo budo esa.

²⁴ “Mama na iso yei sedo gosena diti da naso yei ititisesa amimi na yei rawainda atadena ainda ungo atadera. Edo imo busu ae giti da imo na dubo budo edo utu da usasa awa naso yei ititisesa awasedo dogae ungo daedo utu da usasa awa

bore. ²⁵ Edo Mama ewamei busu da embo imo gae ra te na imo gari ra edo ambojimbi eiawa inemi na iteso bugusena awa ungo gari ra. ²⁶ Edo nanemi imo awa ungodaya yei isaga etena edo mata awodo isaga ise atadena awodo irinono dubo bari rawa mi na dubo budo esa awa ungodajo da mata awa atirari edo na awa ungodajo da mata awa atadi sedo.”

18

IESU BUNDISERA

¹ Iesu awodo God manunugedo atae edo umo yei awa uso ambojimbi de daedo dodo umo Kidron dugoro da awa sembusera. Edo ungo sembudo Iesu uso ambojimbi de buro ainda atisira ainda mambusera.

² Judas indiga sari embo awa yei awa rawari awa umo gosisira ko Iesu iji jiwae uso ambojimbi de ainda dada edo isera. ³ Awasedo Judas isoro embobo diti da de Jew embobo da tumonde bain ari oro simba ari embobo priest babojegari de Pharisee embobo de mi itero mambusera ainde da awa budo buro ainda mambusera. Edo ungo isoro ge emi de edo goriwo jani buriri ainde da.

⁴ Edo Iesu umo ro uso yei adira awa gido gido embo diti da awa kena yise ungodaya yei sisira, “Ingo embo ave eura evi?”

⁵ Edo umo awodo setiri ungo mi mina sisera, “Iesu Nazareth nati embo.”

Edo ungo awa setero Iesu mi mina sisira “Namone embo awa ra.”

⁶ Edo Judas indiga sari embo awa ungodaya teda ainda atisira. Edo Iesu ungodaya yei setiri namone embo awa ra setiri ungo kiambu gun mi yise

edo busu da dudurigurisera. ⁷ Edo Iesu sekago ungodu yei nganega isira, “Ingo embo ave eura evi?”

Setiri ungo mi mina sisera, “Iesu Nazareth nati embo.”

⁸ Edo ungo awa setero Iesu mi mina sisira, “Na matu ingoda yei seteno getewa namone embo awa ra. Edo ingo na eura ise re embo nenei eiawa dowo mambore.” ⁹ Awasedo ro Iesu mi matu sisira awa be isira. Edo unemi matu sisira, “Mama inemi naso yei diti da itesa awa da rawa jajovegae ra.”

¹⁰ Edo Simon Peter mi uso kasiwo gorugedo budo priest gitijigari da uso agipo embo jawo Malchus awa dedo uso dengoro be awa diugurisira.

¹¹ Edo diugetiri Iesu mi Peter da yei sisira, “Iso kasiwo awa sekago uso goru da iti. Edo kotose na naso Mama mi memesi da aga ititira awa indadi ae awa kotose.”

ISORO EMBOBO MI IESU BUDO ANNAS DA YEI MAMBUSERA

¹² Edo isoro embobo diti da ungodu gitijigari de edo Jew embobo da tumondebain ari oro simba ari embobo de mi Iesu sandido bundedo edo umo budo giti Annas da yei mambusera. ¹³ Edo Annas awa priest da gitijigari Caiaphas da uso atogo.

¹⁴ Edo Caiaphas re embo amimi embo da yei sisira embo da mi embo berari awasedo betadira amone ewamei ra sisira.

PETER UMO IESU GAE SISIRA

¹⁵ Simon Peter de ambojimbi nei de Iesu ambo ambo edo mambusera. Edo priest da gitijigari

ambojimbi re awa gari awasedo ambojimbi nei awa Iesu ga daedo priest da gitijigari da mando arapa da totorisira. ¹⁶ Awarate Peter umo ponda ara be demo da atisira. Edo ambojimbi nei priest da gitijigari gari awa ponda sekago mambudo gagara ara be demo da atisira ainda ge sedo Peter budo jo da totorisira.

¹⁷ Edo ara be pirigedo edo gajedo ari gagara mi Peter da yei sisira, “Imo embo ainda ambojimbi nei ta?”

Setiri Peter mi mina sisira, “Na awa aera.”

¹⁸ Edo yei awa jamo jamo etiri gido agipo embobo de isoro embobo ri undugedo edo jiroroka edo ri egise atisera. Edo Peter daedo riawo da mambudo ainda daedo derido ri egise atisira.

PRIEST DA GITIJIGARI NEMBODIBA IESU NGANEGA ISIRA

¹⁹ Edo priest da gitijigari nembodiba mi Iesu uso ambojimbi de uso atopatari de awa nganega isira.

²⁰ Edo Iesu mi uso yei mina sisira, “Na iji berari unjugae edo embomei da dombu da atopatido emona. Edo Jew embobo Jew embobo da tumondebain ari oro da dada eoro edo na isaga da ge sewona edo Jew embobo da dada ari oro da na iji berari embo atopatido emona. Edo na gae unjugari da atopatae. ²¹ Edo ro edo imo na nganega esi? Embo naso atopatari ingewora awa nganega edo gi gae. Na ro atopapotemona awa ungodaa yei nganega edo gi gae. Ungo na ro sewona awa gari ra.”

²² Edo Iesu awodo setiri isoro embo da mi Iesu sogo da dorise sisira, “Ge awodo priest da gitijigari da yei seose.”

²³ Setiri Iesu mi mina sisira, “Na ge biae ro setena awa ge awa embo berari atera einda se awarate naso ge ewamei awa imo ro edo na doresi?”

²⁴ Edo Iesu awodo setiri Annas Iesu digari be awa atiri priest da gitijigari nembodiba Caiaphas da yei itiri mambusira.

PETER SEKAGO UMO IESU GAE SISIRA

²⁵ Peter awa ainda atise ri egise atisira awasedo ungo mi uso yei sisera, “Nango kotera imo awa Iesu da ambojimbini ta rora?”

Setero Peter ge busedo sisira, “Na awa aera.”

²⁶ Edo umu awa setiri priest da gitijigari da agipo embo da Peter mi dedo dengoro diugurisiru ainda orobe da amimi sisira, “Na kotena na imo buro da ungae da gosisenita rora?”

²⁷ Edo umu awa setiri Peter mi sisira, “Awodo aera.” Edo Peter awodo siri kokora egoro sisira.

IESU BUDO PILATE DA YEI MAMBUSERA

²⁸ Edo ungo mi Iesu budo Caiaphas da mando dodo Rome embobo da gitijigari da mando da mambusera. Sipo be sipo de. Edo Jew embobo ungo gitijigari da mando jo da torae isera ainda be awa ungo kotisera ingodena embo Jew ae ainda mando da toradera awa ingodena ingodenaso agodari bejedo edo Jarusegari Bondo awa mana indadera awa ungo awodo kotisera.

²⁹ Awasedo Pilate mi pon da bugudo ungodu yei nganega isira, “Embo eiawa wasiri biae ro etiri gido ingo umu budo naso yei da bugevi?”

³⁰ Setiri ungo mi mina sisera, “Umo wasiri biae ae re nango mi umo mana budo iso yei da bugae etera.”

³¹ Edo ungo awodo setero Pilate mi ungod a yei sisira, “Ingoda agodari awa atira. Ingoda agodari da awodo awasedo umo budo mambudo kasewo.”

Edo umo awa setiri Jew embobo mi mina sisera, “Rome embobo da gitijigari mi nango embo orega da dorase awara sae etira.” ³² Edo ungo awa sisera awa ro Iesu mi matu uso betari awa rawodo ri awa sisira awa be isira.

³³ Edo Pilate sekago gitijigari da mando da torido setiri, ungo mi Iesu budo jo da totorisera. Edo Iesu toriri Pilate mi uso yei nganega isira, “Imo mo Jew embobo da gitijigari nembodiba ta?”

³⁴ Edo umo awodo setiri Iesu mi mina sisira, “Imo kotesa sedo gari emomo inemi naso yei itesi ta ko embo nenei mi naso jawo da sero ingido na nganega esi?”

³⁵ Edo umo awodo setiri Pilate mi mina sisira, “Na awa Jew embo aera. Iso embo topo de ungod a priest babojegari de mi imo awa naso ingo da itera. Edo imo ro etesi?”

³⁶ Edo umo awodo setiri Iesu mi mina sisira, “Na busu da gitijijigegari mi gitijigido era awodo gitijigae ra. Edo na awodo gitijigae etena awa mana naso gitopo mi na Jew embo da ingo da mana itae etera edo naso ambojimbi mi embogo ae etera. Awodo aera. Na awa busu da gitijigadi aera.”

³⁷ Edo umo awodo setiri Pilate mi uso yei sedo gosisira, “Imo ge awodo sesa mo imo mo gitijigari ta?”

Edo Pilate awodo setiri Iesu mi mina sisira, “Imo ge be setesa. Naso aia mi na betiri busu da embo ge be awa atopatadi bugusena. Edo embo ave ge be ingari dipapa edo era embo awa naso ge ingido ira.”

Edo Iesu awodo setiri Pilate mi nganega isira, “Awarate ge be mo rori?”

EMBO MI BARABBAS DIPAPA ISERA

³⁸ Pilate sekago pon da mambudo Jew embobo da yei sisira, “Na embo einda yei wasiri biaae da ro tambae etena. Edo embo emone wasiri biaae ae embo ra. ³⁹ Awarate ingoda wasiri awodo atira awa eire. Gaeko jaige da Jarusegari Bondo da iji de na gajari oro da atima ira embo da awa ingoda yei wujegedo ena. Edo ingo Jew embobo da gitijigari nembodiba awa ingoda yei wujeganase dipapa evi ta?”

⁴⁰ Edo Pilate awodo setiri ungo mi gogo dimbudo uso yei sisera, “Awodo aera nango umo ujo ae era nango Barabbas dipapa era.” Edo Barabbas awa bengono embo edo embo dari betari embo.

19

IESU DORO BETARASE SISERA

¹ Edo Pilate mi setiri ungo mi Iesu vejisera. ² Edo isoro embobo mi bebe mi gitijigari da beo gobe awodo edo uso beo da ititiseru. ³ Edo ungo mi umo ombari kokoi ribori awa itero ombiri uso yei sisera, “Jew embobo da gitijigari nembodiba mata awa iji berari atio.” Edo ungo awa sedo uso yei mambudo ingo mi dombu da doriseru.

⁴ Edo Pilate sekago embo jiwae be atisera ainda yei mambudo sisira, “Giwo na umo budo ingoda dombu da bugadi ena te eiawa giwo na umo eura etena te wasiri biae da ro tambae etena. Edo umone embo wasiri biae ae ra.” ⁵ Edo Iesu beo bebe mi gobe isera awa asugedo edo ombari kokoiribori awa ombudo ponda bugusira. Edo umo ponda bugiri Pilate mi ungodu yei sisira, “Giu embo re eire.”

⁶ Edo Pilate awodo setiri priest babojegari de isoro embobo de mi umo gido ungo mi gogo dimbudo sisera, “Benema mi orega da de. Benema mi orega da de.”

Edo ungo awodo setero Pilate mi ungodu yei sisira, “Awara ingo ingosuka umo budo mambudo benema mi orega da dewo. Edo na umo eura etena te wasiri biae da tambae etena. Edo umone wasiri biae ae embo ra.”

⁷ Edo umo awodo setiri Jew embobo mi mina sisera, “Unemi sevira umo awa God da mei. Edo nangoda agodari mi sira embo ge awodo sadera awa dewo betore.”

⁸⁻⁹ Edo ungo awodo setero Pilate oju edo sekago kasari yei da torido Iesu da yei sedo gosisira, “Imo yei rawainda edo bugusesi?” Setiri Iesu uso ge mina ro sae isira. ¹⁰ Edo Pilate mi uso yei sisira, “Na awa gitijigari nembodiba ra te imo naso ge mina sae esa. Edo eia koteio, na naso goroba mi sae etena umo wujegewo edo na daedo sae etena benema mi orega da dewo sae etena.”

¹¹ Edo Pilate awodo setiri Iesu mi mina sisira, “God mi iso yei goroba awa itiri imo naso yei awodo awa adesa awasedo embo amemi na iso

ingo da itera ainda wasiri bebegae mi iso wasiri biae awa derigetira.”

¹² Edo Pilate eiawa ingido Iesu wujegadi dipapa isira te Jew embobo mi gogo dimbudo uso yei sisera, “Imo umo wujegadesa awa imo Rome embobo da gitijigari nembodiba da otao aera. Edo embo ave umo umosuka awa gitijigari nembodiba sadira embo awa Rome embobo da gitijigari nembodiba da gitopo ra.”

¹³ Edo Pilate ge awa ingido Iesu budo ponda bugudo kasari embo da anumba da anumburisira. Edo yei awa jawo sedo era yei ganuma dada itari Hebrew ge mi sedo era Gabbatha. ¹⁴ Edo Jarusegari Bondo adi ewadera ainda iji soropu da.

Edo Pilate mi Jew embobo da yei sisira, “Ingoda gitijigari nembodiba re eire.”

¹⁵ Edo umo awodo setiri ungo mi gogo nembodiba dimbudo sisera, “De betare. De betare. Benema mi orega da de.”

Edo ungo awodo setero Pilate mi ungodu yei nganega isira, “Ingo ingoda gitijigari nembodiba eiawa benema mi orega da danase dipapa evi ta?”

Setiri priest babojegari mi mina sisera, “Rome embobo da gitijigari nembodiba Caesar awa nngoda gitijigari ra. Nango nei dipapa aera.”

¹⁶ Edo ungo awodo setero Pilate mi Iesu awa ungodu ingo da ititisira benema mi orega da dorase. Awasedo ungo mi Iesu budo mambusera.

UNGO MI IESU BENEMA MI OREGA DORISERA

¹⁷ Iesu umo umosuka uso orega awa ango edo bugudo yei Hebrew ge mi sedo era Golgotha

ainda be awa jiro agatu yei ainda bugusira. ¹⁸ Edo ainda bugudo ungo mi benema mi Iesu orega da dorisera. Edo ungo daedo benema mi embo etoto awa orega etoto da dorisera embo da Iesu da be nei da edo embo nei Iesu da be nei da edo Iesu awa soropuda isira. Edo awodo edo orega awa busu da dederisera.

¹⁹ Edo Pilate mi ove jivetiri ungo mi orega inda ititiseru. Edo Pilate mi jiusira, “Iesu Nazareth nati embo Jew embobo da gitijigari nembodiba.”

²⁰ Edo Jew embobo jiwari eiawa ajigedo gosisera ko yei Iesu benemami orega da dorisera awa nati aikambu awasedo. Edo Pilate ge eiawa Hebrew ge mi Latin Ge mi edo Greek ge mi jiusira. ²¹ Edo Jew embobo da priest babojegari mi Pilate da yei sisera, “Jew embobo da gitijigari nembodiba awodo gaiose te eiedo jiveio, ‘Embo emimi sisira, na awa Jew embobo da gitijigari nembodiba ra.’”

²² Edo ungo awodo setero Pilate mi mina sisira, “Ro nanemi gaetena awa dowo atare.”

²³ Edo isoro embobo Iesu benema mi orega da dedo atae edo uso ombari awa burisera. Edo ombari budo keredo diti 4 awodo isera diti da isoro embo da da awasedo. Edo ungo uso sini daedo burisera. Edo eiawa bo memeia mi dada gaiae rate bo da ra.

²⁴ Awasedo isoro embo mi ungo ungosuka mina sara isera, “Ingode eiawa keradi aera te ingode pipi gaedo embo amemi beiri awa gore.” Edo ungo awodo isera awa ro jiwari mi sisira awa be isira. Edo jiwari mi sira,

“Ungo mi naso ombari awa keredo da da edo burisera edo pipi edo naso sini awa amemi

beiri awa gadi isera.”

²⁵ Edo Iesu da ai de uso ai da jao Mary, Clopas da aro de Mary Magdalene de awa Iesu da orega demo da dederi gido atisera. ²⁶ Edo Iesu uso ai de edo ambojimbi umo dubo budo isira awa ainda derido atero gido uso ai da sisira, “Evetu iso mei eire.” ²⁷ Edo umo awodo sedo ambojimbi da yei sisira, “Iso aia eire.” Edo iji ainde tuturo edo ambojimbi mi evetu awa budo uso mando da atarase budo mambudo edo umo simba edo isira.

IESU BEBETISIRA

²⁸ Iesu rora berari awa inono isira awa gido umo sisira, “Na umo ujo ira.” Setiri jiwari awa be isira.

²⁹ Edo adego grape ngamo tokaka de awa ainda atisira awa bo da patido ri patu da mendo da itido jigero Iesu da begiti da indarase mambusira.

³⁰ Edo Iesu grape ngamo tokaka awa budo sisira, “Atae etira.” Edo umo awa sedo tumo gosugedo bebetisira.

IESU DA DEMBURO GAEDO URUGURISERA

³¹ Edo iji awa Friday edo ungo tamo awa orega da atiroro ungodu tumondebain ari iji eurase ujo ae isera edo daedo ainda be awa Jarusegari Bondo da iji de da awasedo. Awasedo Jew embobo mi Pilate da yei sisera, “Embomei oiawa burigi betorase awa inemi awara saso isoro embobo mi mambudo ungodu tei dedo jorore. Edo ungo awodo oro embobo oiawa burigi betoro ungodu tamo awa orega da awa dodo itoro wosore.”

³² Awasedo isoro embobo mi mambudo embo Iesu da be nei da ainda tei etoto awa dedo ereregedo edo embo Iesu da be nei da ainde daedo

dedo tei erereguriserá. ³³ Awarate ungo Iesu da yei da bugudo umo matu bebetisira awa gido gido uso tei dedo eregae doturiserá. ³⁴ Awarate isoro embo da mi uso gi mi Iesu da demburo da sinegetiri ororo de sasaka de bebesisira.

³⁵ Edo embo eiawa etiri gosisira embo amimi awa sisira ingo mi gebe awase. Edo umo ro sisira awa gebe. Edo umo ro sira awa gebe gosira.

³⁶ Edo isoro embobo awa etero ro jiwari mi sira awa be isira. Edo jiwari mi sira
“Ungomi uso vetu da mana doró eragadira.”

³⁷ Edo jiwari nei mi sira,

“Embo mi uso demburo da gaisera awa gongon adera.”

UNGO MI IESU GOUSERA

³⁸ Arimathea nati embo jawo Joseph awa Iesu ambo ambo ari embo ra te umo Jewembobo awa oju edo umo Iesu ambo ambo edo isira awa isaga ari georase edo isira. Edo unemi Pilate da yei mambudo Iesu da tamo orega da awa budo itari wosarase sedo gosisira. Edo Pilate mi awara setiri, Joseph Iesu da tamo orega da awa budo itiri wosetiri mambusira. ³⁹⁻⁴⁰ Edo Nicodemus embo tumba de Iesu gadi mambusira embo awa Joseph ga da mambusira. Edo Jew embobo mi siwo muno de ri mu mi isera. Edo embo betari bo siwo einda patido edo embo ainda tamo awa dogedo edo gowadi sedo isera. Edo eiawa ungodá wasiri ra. Awasedo Nicodemus siwo eiawa jiwae be budo mambusira. Edo embo etoto emimi Iesu da tamo awa budo bo awa siwo einda patido edo Iesu da tamo awa bo amimi dogiserá. ⁴¹ Edo Jew embobo mi Iesu doriserá yei ainda demo da awa

ri guru ra. Edo ri guru da awa embo gowari meko seka ra. Edo embo gowari meko einda embo da ave gowae atinatina. ⁴² Edo iji awa Jew embobo da mamaso ari iji aikambu isira awasedo ungo Iesu gowari dipapa isera simba adi ae. Edo embo gowari meko awa aikambu gido Iesu ainda ititiseru.

20

UNGOMI GOWARI MEKO AWA TEPO GOSIS-ERA

¹ Sunday sipo keredo piri Mary Magdalene gowari meko da mambusira. Edo ainda mambudo ganuma nembodiba meko be gajiseru awa demo da mambudo atiri gosisira. ² Edo awa gido umo sumbudo Simon Peter de edo ambojimbi nei Iesu mi dubo budo isira ainda yei sisira, “Ungo mi Bada da tamo gowari meko da awa budo mambara. Edo umo yei rawainda iteri awa nango gaera.”

³ Edo evetu awa awodo setiri Peter de ambojimbi nei de awa gowari meko da mambuseru.

⁴ Edo ungo etoto awa sumbero edo ambojimbi nei mi sumbudo Peter derigedo edo meko da giti bugusira. ⁵ Edo umo kukubedo Iesu da tamo kera isera bo awa gosisira te umo torae doturisira. ⁶ Edo uso gun da awa Simon Peter mi bugudo dambuderari meko da totorisira. ⁷ Edo umo torido bo Iesu kera isera awa ainda pasido atiri gosisira edo uso beo dogiseru bo awa atiri gosisira. Edo bo awa bo nei da demo da atae ra te demo da umo umosuka bojegari atiri gosisira. ⁸ Edo ambojimbi nei giti meko da bugusira awa

Peter ambo ambo edo totorisira. Edo umu torido gido umu ge be isira. ⁹ Edo matu ro jiwari mi sisira Iesu betedo edo sekago eradira sisira awa matu ungu gae isera. ¹⁰ Edo ambojimbi sekago nati da engenemburiseru.

IESU MARY MAGDALENE DA YEI ISAGA ISIRA

¹¹ Edo Mary awa meko ponda derido ji sise atisira. Edo umu ji sise kukubedo meko jo awa gosisira. ¹² Edo umu asisi ewamei etoto ombari parara berari edo yei Iesu da tamo atisira ainda da uso kopiri da edo da uso tei da edo atero gosisira.

¹³ Edo umu diti jo da edo gosiri ungu mi nganega isera, “Evetu imo ro edo ji sesi?”

Setero unemi mina sisira, “Ungu mi naso Bada budo mambura edo yei rawainda iteri awa na gae ra.”

¹⁴ Edo Mary awa sedo kaveregedo Iesu ainda derido atiri gosisira te umu Iesu awa umu gae ra.

¹⁵ Edo Iesu mi evetu ainda yei sisira, “Evetu imo ro edo ji sesi? Edo imo ave eura esi?”

Setiri edo Mary umu kotisira awa buro awa simba ari embo awa kotedo uso yei sisira, “Embo ewamei imo umu budo mambesi ta yei rawainda itesi awa segae gido na mambudo umu bane.”

¹⁶ Edo evetu awa setiri, Iesu mi uso yei sisira, “Mary.”

Setiri umu Iesu kena wareregedo Hebrew ge mi sisira, “Rabboni,” ainda be awa “Atopatari.”

¹⁷ Edo evetu awa awodo setiri Iesu mi uso yei sisira, “Na tamesi eose ko na Mama da yei sekago vitae atena. Awarate imo naso nanonamendi da yei mambudo seio gore, ‘Na sekago embo

naso Mama edo ingoda Mamo edo naso God edo ingoda God ainda yei vivitena.’ ”

¹⁸ Edo Iesu awodo setiri Mary Magdalene ambojimbi da yei mambudo sisira, “Na Bada getena.” Edo umo awodo sedo uso binga awa ungodu yei sisira.

IESU AMBOJIMBI DA YEI ISAGA ISIRA

¹⁹ Edo Sunday ongobo de ambojimbi dada edo mangiro be dedo atisera ainda be awa ungo Jew embobo da gitijijigegari awa oju edo gido. Edo Iesu bugudo ungodu soropuda dederisira. Edo ainda derido sisira, “Jo jamo jamo de atiwo.”

²⁰ Edo umo awa sedo uso ingo de dembuoro de awa ujiji isira. Edo ambojimbi Bada gido iaviri mi ungodu jo awa beda isira.

²¹ Edo Iesu sekago ungodu yei sisira, “Jo jamo jamo de da atiwo. Edo Mama mi na ititisira da awodo nanemi ingo ititena.” ²² Edo umo awa sedo oena ungodu yei pusedo sisira, “Asisi Kotopu buwo. ²³ Edo ingo embo da wasiri bebegae kotembedo doadewa awa ungodu wasiri bebegae awa atae adira te ingo embo da wasiri bebegae kotembedo doae adewa awa ungodu wasiri bebegae awa atadira.”

THOMAS SASAINBEDO GE BE ISIRA

²⁴ Edo Iesu bugusira iji ainde ambojimbi da Thomas uso jawo dirugurisera dindiga awa ainda daedo atae ra. ²⁵ Awasedo ambojimbi nenei mi uso yei sisira, “Nango Bada gositara.”

Setero Thomas mi ungodu yei sisira, “Na uso benema mi ingo da dorisera ainda bubuko awa gae adena edo uso bubuko awa jigae adena awa

na mana ge be adena. Edo na ingo mi uso demburo da bubuko awa jigae adena awa na ge be adi aera.”

²⁶ Edo pura da atae etiri ainda amboda ambojimbibi awa sekago mando jo da dada isera. Edo iji einde Thomas awa daedo ainda ra. Edo ungo mangiro be didigurisera te Iesu bugudo ungodateda dederisira. Edo ainda derido atise ungodayei sisira, “Jo jamo jamo de atiwo.” ²⁷ Edo umowa sedo Thomas da yei sisira, “Na ainda iso ingo mi tamesi edo edo naso ingo gio. Edo awodo edo iso ingo gogorugedo naso demburo jigido gio. Edo mana mana dodo na ge be eio.”

²⁸ Setiri Thomas mi sisira, “Imo awa naso Bada edo naso God.”

²⁹ Edo Thomas awodo setiri Iesu mi uso yei sisira, “Imo na gosesa awasedo imo na ge be esa. Embo ave na gae rate na ge be edo era awa ungo dubo ewamei edo era.”

GEBE EDO WASIRI MATA AWA ATARI BADEWA

³⁰ Edo Iesu uso ambojimbibi de atise ari wasiri nembogamo jiwae be isira te na eiawa berari ainda jiwae ra. ³¹ Edo na ove eiawa jivetena awa ingo Iesu awa God da mei edo umowa soregari embo God mi itari bugarase sisira awa ge be awase etena. Edo ingo eiawa ge be ise uso jawo da wasiri mata awa atari badewa.

21

IESU AMBOJIMBI 7 DA YEI ISAGA ISIRA

¹ Amboda iji da umowa jirora Tiberias ainda Iesu uso ambojimbibi da yei umowa umosuka ujiji etiri

gosisera. ² Edo eiedo isira. Simon Peter de Thomas uso jawo dirugedo dindiga sisera ainde Nathanael Galilee busu embo uso nati Cana edo Zebedee da memei de edo ambojimbi nenei etoto de awa dada anumbedo atisera. ³ Edo Simon Peter mi ambojimbi nenei da yei sisira, “Na wo oiro adi mambadena.” Edo Peter awodo setiri ungo mi uso yei sisera, “Nango ingae da mambadera.” Awasedo ungo berari nga da sirido mambusera te ungo wo beradi tumba da awa jarisera te wo da ro bae isera.

⁴ Edo waiko vitido piri Iesu kora da dederisira te ambojimbi Iesu awa gadi jarisera.

⁵ Edo unemi ungo jawo sedo sisira, “Singa banga ingo wo dimbevi ta?”

Setiri ungo mi mina sisira, “Da ro baera.”

⁶ Edo ungo awodo setero unemi ungodu yei sisira, “Ingoda monga awa ingoda ingo be kena nga demo da pigewo edo ainda wo tambadewa.” Setiri ungo ungodu monga pigedo edo monga awa jumbari nga da vitari awa sago ae isira ainda be awa ungo wo jiwae be burisera awasedo.

⁷ Edo Iesu mi ambojimbi da dubo budo isira amimi Peter da yei sisira, “Omone Bada ra.” Edo omone Bada ra ingisira awa Simon Peter umo uso bo tu de isira awasedo uso bo tamo awa budo sekago asugurisira. Edo asugedo umo da kekapuiya isira. ⁸ Edo ambojimbi nenei awa wo monga de awa nga de jumbudo ambo da diga da bugusera. Edo ungo awa kiambu beda go wo oiro isera awasedo. ⁹ Edo ungo poi da vivitigedo riawo ainda eviri gosisera. Edo ri da awa wo de ambe de eviri gosisera.

¹⁰ Edo Iesu mi sisira, “Wo boroko betewa awa nenei budo pou.”

¹¹ Setiri Simon Peter mambudo monga awa jumbiri poi da vivitisira. Edo monga awa wo jiwae be mi ato ae isira ungoda ajigari awa 153 awarate monga diwae isira. ¹² Edo Iesu mi ungoda yei sisira, “Puwo indari indawe.” Edo umo awodo setiri ambojimbi ungo oju kiambu de umo averi awa nganega ae doturiseru ko ungo gosiseru umo awa Bada awasedo. ¹³ Awasedo Iesu ungodu yei mambudo ambe ititisira. Edo wo de da awodo isira.

¹⁴ Edo Iesu betetiri God mi etiri erido iji ta-monde umo umosuka ambojimbi da yei isaga isira.

IESU PETER GA DA GE SISIRA

¹⁵ Edo ungo indari indero Iesu mi Simon Peter da yei sisira, “Simon John da mei iso dubo bari naso yei mo embo nenei da dubo bari naso yei da eiedo aeta?”

Setiri Peter mi mina sisira, “Ge be Bada, imo gosesa na imo dubo burena.”

Edo umo awodo setiri Iesu mi uso yei sisira, “Naso sheep simba eio.”

¹⁶ Edo Iesu awodo sedo sekago uso yei sisira, “Simon John da mei imo na dubo buresi ta?”

Setiri Peter mi mina sisira, “Gebe Bada imo gosesa na imo dubo burena.”

Edo umo awodo setiri Iesu mi uso yei sisira, “Naso sheep simba eio.”

¹⁷ Edo Iesu awa sedo sekago uso yei sisira, “Simon John da mei, imo na dubo buresi ta?”

Setiri Peter dubo vevera isira ko Iesu iji ta-monde umo nganega isira, “Imo na dubo buresi ta?” Edo dubo vevera de uso yei sisira, “Bada imo rora berari gari ra edo imo gosesa na imo dubo burena.”

Edo Peter awodo setiri Iesu mi uso yei sisira, “Naso sheep simba eio. ¹⁸ Edo na iso yei ge be sena, imo mei singa atisera iji ainde imo iso sini awa digido edo imo yei rawainda mambadi dipapa edo isesa ainde mambudo isesa. Awarate imo ogo adesa iji ainde imo iso ingo kerere aso embo nei mi imo awa budo imo gitijigido budo imo dipapa ae esa yei ainde mambadira.” ¹⁹ Edo awa sisira awa Peter umo rawodo betadiri awa sisira. Edo sisira Peter da betari mi God da jawo awa jigari eradira. Edo Iesu awa sedo Peter da yei sisira, “Na ambo ambo eio.”

²⁰ Edo Peter wareregedo ambojimbi nei Iesu mi dubo budo isira awa gosisira ambojimbi Iesu da demo da desegego nganega isira Bada imo mo amemi indiga eiri sisira. ²¹ Edo Peter ambojimbi awa gido Iesu da yei sisira, “Bada embo einda mo ro eiri?”

²² Edo Peter awodo setiri Iesu mi mina sisira, “Umo wasiri de atadira awa wasiri de atirari na engenembadena iji awa ta rora. Edo na awodo dipapa adena awa amone naso buro ra. Imo na ambo ambo eio.”

²³ Awasedo ge awa Iesu ambo ambo ari embobo berari da yei rawusira ambojimbi eiawa betadi aera awa. Awarate Iesu umo betadi aera awodo sae ra. Te umo sisira, “Umo wasiri de atadira awa umo wasiri de atirari na engenembadena iji awa

ta rora. Edo na awodo dipapa adena awa naso buro ra.”

²⁴ Edo embo re embo amimi wasiri eiawa iri gosisira embo amimi sira. Edo unemi daedo wasiri isira awa gaira. Edo ingodena gosera umo ro sise gaira awa ge be ra.

JIWARI DA SANGOVE

²⁵ Iesu ari wasiri nenei jiwae be isira. Edo embo da mi uso ari wasiri awa berari kiki da jiwae etira awa busu berari awa jiwari jigari inono ae awasedo uso wasiri nenei ainda kiki jiwari sago aera.

BINGA EWAMEI IESU KERISO DA JAWO DA
The New Testament in the Ewage-Notu Language of
Papua New Guinea
Nupela Testamen long tokples Ewage-Notu long
Niugini

copyright © 1987 Wycliffe Bible Translators, Inc.

Language: Ewage-Notu

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-19

PDF generated using Haiola and XeLaTeX on 11 Nov 2022 from source files dated 9 Oct 2020

901ecdaa-e20b-5e4f-a560-92b077a0eea3